

BUKU TEKS KELAS PENGAJIAN ISLAM PERKIM

AKIDAH TAHAP PERTENGAHAN



PERTUBUHAN KEBAJIKAN ISLAM MALAYSIA (PERKIM)

Edisi Pertama

BUKU TEKS KELAS PENGAJIAN ISLAM PERKIM

AKIDAH

TAHAP PERTENGAHAN



PERTUBUHAN KEBAJIKAN ISLAM MALAYSIA (PERKIM)

Edisi Pertama

Cetakan Pertama, 2021
©Pertubuhan Kebajikan Islam Malaysia, 2021

Hak cipta terpelihara. Setiap bahagian daripada terbitan ini tidak boleh diterbitkan semula, disimpan untuk pengeluaran atau dipindah kepada bentuk lain sama ada dalam bentuk termasuk elektronik, mekanikal, gambar, fotokopi, rakaman atau lain-lain tanpa mendapat izin daripada Pertubuhan Kebajikan Islam Malaysia (PERKIM) terlebih dahulu.

Perpustakaan Negara Malaysia
Data Pengkatalogan-dalam-penerbitan

ISBN 978-967-25609-2-0

Dr. Nor Raudah Hj. Siren,
Dr. Muhammad Ayman al-Akiti, Dr. Suariza@Hidayah Muhammad

1. Pengajian Untuk Mualaf
2. Pengajian Akidah Tahap Pertengahan- Religious Aspects-Islam I.Judul

Penerbit

Pertubuhan Kebajikan Islam Malaysia (PERKIM)
Ibu Pejabat PERKIM Kebangsaan
Tingkat 4 & 6, Bangunan PERKIM
150, Jalan Sultan Azlan Shah (Jalan Ipoh)
51200 Kuala Lumpur

Laman sesawang: www.perkim.net.my
Tel: 03-40412482/ 03-40426224
Faks: 03-40427403
Website: <https://perkim.net.my>
Emel: info@perkim.net.my

Pencetak

Sarjana Media Sdn. Bhd.
No.38, Jalan Usahawan 7 Off Jalan Kilang,
Taman Sri Rampai,Wilayah Persekutuan
53300 Kuala Lumpur
Tel 03 41417424

EDITORIAL

Penasihat

Y.Bhg. Tan Sri Dr. Mohd Yusof Noor

Ketua Editor

Tuan Haji Mamat Che Chik

Penolong Ketua Editor

Dr. Suariza@Hidayah Muhammad

Editor

Encik Muhammad Farhan Tee Abdullah

Encik Muhammad Jais Mariappan Abdullah

Puan Siti Munirah Sayed Mohd Hamdan

Puan Nur Syahirah Musa

Encik Abdul Qawi Navine Abdullah

Encik Mohd Yusoff Ahmad

Encik Ghazali Ismail

Encik Mohamad Nizam Abd Razak

Cik Zaatil Hidaayah Ahmad Bustaman

Puan Wan Zubaidah Wan Yusoff

Puan Rukiah Sungip

Encik Zafri Ismaiskandar Abdul Ghani

Encik Sh Muhammad Amiruddin Sh Sulaiman

Haji Khalid Mohd Noor

Encik Syed Azman Syed Ariffin

Puan Siti Nasryrah Rosli

Encik Muhammad Faiz Md Yusoff

Haji Mohd Subri Jaafar

Puan Rosnaliza Ahmadiah

Puan Aishah Abdul Wahab

Encik Mohd Jogi Panjaitan Maruli

Dr. Mohd Faisal Mohamed

Encik Abdul Ghani Abdullah

Encik Ali Abdullah @ Lee Kin Hong

Puan Nur Habeebah Muniandi

Sidang Editorial

Prof. Madya Dr. Razaleigh Muhamat @ Kawangit

Prof. Madya Dr. A'dawiyah Ismail

Prof Madya Dr. Mohd Afandi Mat Rani

Prof Madya Dr. Mariam Abd. Majid

Dr. Muhammad Yusuf Marlon Abdullah

Dr. Nor Raudah Hj. Siren

Dr. Muhammad Ayman al-Akiti

Dr. Aisyah Jami'an, S.Ag

Dr Azri Bhari

Dr. Mohd Izzat Amsyar Mohd Arif

Dr. Amiratul Munirah Yahaya

Dr. Nur A'thiroh Masyaa'il Tan Abdullah @ Tan Ai Pao

Encik Ahmad A'toa' Mokhtar

Encik Faezy Adenan

Encik Kamarulzaman Kawi

Urusetia

Encik Firdaus Lokman Tah

Encik Ahmad Hasaidi Said

Encik Muhammad Hizam Abdul Rahim

Cik Nur Shazleen R. Samsul Bahari

Cik Umi Musfirah Abdul Ghani

PENDAHULUAN

Pengajian Akidah Tahap Pertengahan adalah sambungan bagi Pengajian Akidah Tahap Asas yang memberikan pendedahan dan pemahaman aspek yang penting mengenai Allah SWT. Mengenal Allah SWT sebagai Pencipta dan menurunkan al-Quran sebagai panduan untuk manusia dengan melaksanakan kehidupan harian yang menjadikan Islam sebagai agama yang sempurna dan selamat untuk dianuti.

Kesempurnaan agama Islam meletakkan manusia di tempat yang paling mulia berbanding penciptaan yang lain. Kejadian Nabi Adam AS sebagai manusia pertama merupakan bukti keperluan kewujudan manusia yang akan bertindak memakmurkan muka bumi yang sudah sedia diciptakan oleh Allah SWT.

Oleh itu, buku ini diterbitkan kepada mualaf yang mahu mengenali dirinya sebagai hamba dan mengenali Allah SWT sebagai Penciptanya.

KANDUNGAN

BAHAGIAN 1 - HAKIKAT ALLAH SWT.....	1
1. HAKIKAT ALLAH SWT.....	1
1.1 Hikmah Penciptaan Makhluk	3
1.2 Tanda-tanda Kebesaran Allah SWT	5
BAHAGIAN 2 - AKIDAH DALAM KEHIDUPAN.....	25
2. AKIDAH DALAM KEHIDUPAN	25
2.1 Kepentingan Akidah dalam Kehidupan.....	25
2.2 Kesan Akidah Islam dalam Kehidupan Seseorang Muslim.....	27
2.3 Hubungan Akidah dengan Syariat dan Akhlak.....	37
2.4 Akidah Ahli Sunah Wal Jamaah	39
BAHAGIAN 3 - IMAN	44
3. IMAN.....	44
3.1 Cabang-cabang Iman.....	46
3.2 Perkara-perkara yang Membatalkan Iman.....	51
3.3 Ciri-ciri Akidah yang Benar	61
3.4 Ciri-ciri Akidah yang Salah.....	62
BAHAGIAN 4 – KESIMPULAN	64
4. KESIMPULAN	64

BAHAGIAN 1

HAKIKAT ALLAH SWT

1. HAKIKAT ALLAH SWT

Sebelum membincangkan tentang hikmah penciptaan makhluk terlebih dahulu kita perlu mengetahui tentang hakikat Allah SWT. Hakikat Allah SWT mestilah diketahui berdasarkan maklumat yang diberikan oleh Allah SWT melalui wahyu-Nya dalam al-Quran mahupun al-Hadith. Tidak ada sesiapapun yang dapat mengetahui hakikat Allah SWT melalui sumber-sumber yang lain.

Berdasarkan wahyu-Nya, kita mengetahui bahawa Allah SWT adalah Tuhan yang Maha Esa yang berbeza daripada segala makhluk yang terdapat dalam isi alam semesta ini. Firman Allah SWT dalam Surah al-Ikhlas (112) ayat 1:

ۚ لَمْ يَلِدْ وَلَمْ يُوْلَدْ ۚ ۖ أَنَّهُ الصَّمَدُ ۖ ۚ قُلْ هُوَ اللَّهُ أَحَدٌ ۖ ۚ وَلَمْ يَكُنْ لَّهُ كُفُواً أَحَدٌ ۖ

Maksudnya: Katakanlah (wahai Muhammad): (*Tuhanku*) ialah Allah Yang Maha Esa (1) Allah Yang menjadi tumpuan sekalian makhluk untuk memohon sebarang hajat (2) ia tidak beranak, dan ia pula tidak diperanakkan (3) Dan tidak ada sesiapapun yang seerupa dengan-Nya (4)

Ayat di atas memperlihatkan Allah SWT bersifat dengan segala sifat kesempurnaan dan Maha Suci daripada segala sifat kekurangan. Allah SWT tidak sama dengan makhluk dalam apa bentuk sekalipun. Adalah mustahil Allah SWT mempunyai

sebarang sifat kelembahan. Allah SWT sahaja yang menciptakan manusia dan segala isi alam ini. Oleh kerana Allah SWT Maha Sempurna, maka Allah SWT mencipta alam ini dengan penuh kesempurnaan. Oleh kerana Allah SWT Maha Pengasih dan Penyayang, maka Allah SWT mencipta alam ini dengan penuh kasih sayang. Begitu juga, Allah SWT Maha Bijaksana, maka Allah SWT mencipta alam ini dengan serba lengkap dan tahu segala kelembahan, kekurangan, keperluan dan kekuatan alam ini.

Dengan itu, untuk memelihara alam yang diciptakan-Nya, Allah SWT telah menurunkan peraturan-peraturan-Nya untuk dipatuhi. Bagi makhluk yang berakal seperti manusia dan jin, Allah SWT menurunkan peraturan-Nya dalam bentuk hukum syarak dan juga hukum alam. Bagi makhluk yang tidak berakal pula seperti haiwan dan tumbuh-tumbuhan, Allah SWT menurunkan hukum alam (hal yang ditentukan oleh keadaan alam seperti usia, sifat objek dan lain-lain) sahaja.

Bagi menjamin kehidupan yang sempurna, semua makhluk perlu taat dan patuh kepada peraturan ciptaan Allah SWT sama ada dalam bentuk hukum syarak mahupun hukum alam. Manusia yang ingkar mematuhi hukum syarak dan juga hukum alam ciptaan Allah SWT akan menerima pembalasan di dunia dan di akhirat. Begitu juga makhluk lain seperti haiwan dan tumbuh-tumbuhan yang tidak patuh kepada hukum alam ciptaan Allah SWT akan turut menghadapi kemasuhan di dunia ini. Ini adalah kerana Allah SWT Maha Mengetahui apa yang baik dan apa yang tidak baik bagi makhluk-makhluk ciptaan-Nya.




Gambar 1 : Manusia, Haiwan dan Alam

1.1 Hikmah Penciptaan Makhluk

Manusia pada pandangan Islam merupakan makhluk yang paling mulia. Hikmah manusia dijadikan sebaik-baik makhluk di dunia ialah,

1. Supaya manusia menginsafi dirinya bahawa Allah SWT menciptakannya dalam bentuk yang sempurna.
2. Supaya manusia bersyukur di atas nikmat kurniaan Allah SWT yang telah mencipta manusia sebaik-baik kejadian.
3. Membolehkan manusia menjadi khalifah di muka bumi untuk menegakkan Islam dan memakmurkan alam.
4. Supaya manusia tunduk kepada perintah Allah SWT dalam segenap aspek kehidupan.



Rajah 1 : Tugas Manusia di Muka Bumi

Manusia diberikan mandat oleh Allah SWT untuk mentadbir dan memerintah alam ini dengan baik. Namun begitu, kedudukan manusia sebagai khalifah yang mentadbir dan memerintah alam ini tidak bermakna mereka boleh mengeksploitasi alam ini sesuka hati mereka. Oleh kerana kedudukan manusia sebagai khalifah dan hamba Allah SWT, maka manusia berada pada kedudukan yang tersendiri dan lebih mulia daripada segala makhluk yang lain. Dengan itu, manusia tidak sepatutnya menjadi hamba atau bertuhankan kepada makhluk yang lain selain daripada Allah SWT.

Kesimpulannya, manusia yang sempurna ialah manusia yang sentiasa menyedari dan menghayati kedudukannya sebagai khalifah dan pada masa yang sama juga sebagai hamba Allah SWT di alam ini.



Gambar 2 : Manusia diciptakan sebagai Khalifah di Muka Bumi

1.2 Tanda-tanda Kebesaran Allah SWT

Perkembangan ilmu pengetahuan telah membawa manusia kepada pembuktian tanda-tanda kekuasaan dan kebesaran Allah SWT. Kemajuan ilmu sains telah banyak membuktikan kebenaran al-Quran melalui penemuan-penemuan yang dilakukan secara saintifik. Allah SWT telah memerintahkan agar manusia melakukan penyelidikan dan pemerhatian terhadap kejadian alam ini sebagai meningkatkan keimanan seseorang. Firman Allah SWT dalam Surah Yunus (10) ayat 101:

فُلِّ انْظُرُوا مَاذَا فِي السَّمَاوَاتِ وَالْأَرْضِ وَمَا تُعْنِي الْآيَاتُ

وَالْأُنْدُرُ عَنْ قَوْمٍ لَا يُؤْمِنُونَ
١١١

Maksudnya: Katakanlah (Wahai Muhammad): “Perhatikanlah apa yang ada di langit dan di bumi! Tidaklah bermanfaat tanda-tanda (kebesaran Allah) dan rasul-rasul yang memberi peringatan bagi orang yang tidak beriman.” (101)

1.2.1 Kejadian Manusia

Al-Quran telah menjelaskan kejadian manusia di Alam Rahim. Firman Allah SWT Surah al- Insan (76) ayat 2:

إِنَّا هَلَقْنَا إِلَيْهِ أُنْسَدَنَّ مِنْ نُطْفَةٍ أَمْشَاجٍ نَبْتَلِيهِ
فَجَعَلْنَاهُ سَمِيعًا بَصِيرًا

Maksudnya: Sesungguhnya Kami telah aturkan cara mencipta manusia bermulanya dari air mani yang bercampur (dari pati benih lelaki dan perempuan), serta Kami tetap mengujinya (dengan kewajipan-kewajipan); oleh itu maka Kami jadikan dia berkeadaan mendengar dan melihat. (2)

Menurut Ibn Jurair al-Tabari, asal perkataan *nutfah* ialah *nutf* ertiya air yang sedikit yang terdapat di dalam sesuatu bekas sama ada telaga, tabung dan sebagainya. Sementara perkataan *amsyaj* berasal daripada perkataan *masyj* yang bererti percampuran. Berasaskan kepada makna perkataan tersebut maksud ayat di atas ialah sesungguhnya Kami (Allah SWT) menciptakan manusia daripada air mani lelaki dan air mani perempuan. Daripada *nutfah* inilah Allah SWT menciptakan anggota-anggota yang berlainan, tingkah laku yang berbeza serta menjadikan lelaki dan perempuan. Daripada *nutfah* lelaki akan terbentuknya

saraf dan tulang. Manakala dari *nutfah* perempuan akan terbentuknya darah dan daging. Allah SWT berfirman dalam Surah al-Mu'minun (23) ayat 14:

ثُمَّ خَلَقْنَا الْنُطْفَةَ عَلَقَةً فَخَلَقْنَا الْعِلْقَةَ مُضْغَةً
فَخَلَقْنَا الْمُضْغَةَ عِظَلَمًا فَكَسَوْنَا الْعِظَلَمَ لَحْمًا
ثُمَّ أَنْشَأْنَاهُ خَلْقًا ءَاخَرَ فَتَبَارَكَ اللَّهُ أَحْسَنُ

الْخَلِقِينَ

Maksudnya: Kemudian Kami ciptakan air benih itu menjadi sebuku darah beku, lalu Kami ciptakan darah beku itu menjadi seketul daging; kemudian Kami ciptakan daging itu menjadi beberapa tulang; kemudian Kami balut tulang-tulang itu dengan daging. Setelah sempurna kejadian itu Kami bentuk dia menjadi makhluk yang lain sifat keadaannya. Maka nyatakan kelebihan dan ketinggian Allah sebaik-baik Pencipta. (14)

Hal ini telah diakui oleh sains perubatan berkaitan dengan kejadian janin di Alam Rahim. Menurut kajian sains, manusia sebagai individu yang terdiri daripada sel daging, tulang, saraf, darah dan lain-lain yang membentuk jasad. Pertemuan benih ayah dan ibu membentuk janin dalam rahim ibu, yang tumbuh secara evolusi. Setelah janin itu sempurna, ia lahir sebagai bayi.



Gambar 3 : Proses Penciptaan Manusia di Alam Rahim

Keunikan penciptaan manusia di Alam Rahim ini membuktikan adanya satu kuasa yang amat besar dan memiliki kekuatan dan keupayaan yang tiada tandingannya. Penciptaan yang unik ini tidak mungkin berlaku secara semula jadi bahkan amat teratur prosesnya serta membentuk manusia yang memiliki bentuk yang serupa sama ada secara sempurna mahupun tidak sempurna (cacat) sebagai ujian daripada Allah SWT.

Teknologi mungkin mampu menghasilkan bayi yang dicipta. Namun, kejadiannya amat tidak sama dengan penciptaan Allah SWT kerana adanya penciptaan roh. Para ulama Islam sepakat mengatakan peniupan roh ini berlaku selepas empat puluh hari dan selepas terbentuknya organ-organ tubuh termasuklah organ seks. Nilai kehidupan mereka telah pun bermula sejak di Alam Rahim lagi. Ketika di Alam Rahim perkembangan mereka bukanlah proses perkembangan fizikal semata-mata tetapi telahpun mempunyai hubungan dengan Allah SWT melalui ikatan kesaksian sebagaimana yang disebutkan oleh Allah SWT di dalam al-Quran Surah al-A'raf (7) ayat 172:

وَإِذْ أَخَذَ رَبُّكَ مِنْ بَنِي آدَمَ مِنْ ظُهُورِهِمْ
ذُرِّيَّتُهُمْ وَأَشَهَّدُهُمْ عَلَىٰ أَنفُسِهِمْ أَلَّا سُתُّ يَرَيُّكُمْ
قَالُواْ بَلَىٰ شَهَدْنَا أَنَّ تَقُولُواْ يَوْمَ الْقِيَمَةِ إِنَّا كُنَّا

عَنْ هَذَا غَافِلِينَ



Maksudnya: Dan (ingatlah wahai Muhammad) ketika Tuhanmu mengeluarkan zuriat anak-anak Adam (turun-temurun) dari (tulang) belakang mereka, dan Ia jadikan mereka saksi terhadap diri mereka sendiri, (ambil Ia bertanya dengan firmanNya): "Bukankah Aku tuhan kamu?" Mereka semua menjawab: "Benar (Engkaulah Tuhan kami), kami menjadi saksi". Yang demikian supaya kamu tidak berkata pada hari kiamat kelak: "Sesungguhnya kami adalah jalai (tidak diberi peringatan) tentang (hakikat tauhid) ini".(172)

Dengan ini, roh dan jasad saling bantu membantu untuk meningkatkan martabat dan kejadian insan di sisi Allah SWT.

Tidak dinamakan manusia sekiranya seseorang itu hanya memiliki jasad, tetapi tidak mempunyai roh. Seseorang juga tidak bernama manusia jika dia hanya mempunyai roh, sedangkan jasadnya tidak kelihatan. Kewujudan jasad tanpa roh dapat dilihat oleh manusia lain sebagai mayat kerana dia tidak lagi bernyawa. Namun, ada juga jasad yang masih bernyawa dengan roh di dalamnya, tetapi roh itu sebenarnya telah mati lantaran tidak dipelihara kebaikan dan makan minumnya sehingga muncul manusia-manusia bersifat haiwan.

Kewujudan roh tanpa jasad pula sememangnya tidak dinamakan manusia kerana makhluk yang tidak berjasad ini biasa dikenali sebagai jin, syaitan, malaikat atau arwah. Melalui roh, manusia akan mengalami proses pembesaran. Tanpa roh manusia hanya memiliki jasad yang tidak akan berfungsi dan tidak bermakna. Begitulah Allah SWT menjadikan keajaiban

penciptaan manusia untuk kita berfikir tentang kekuasaan-Nya.

1.2.2 Kejadian Lautan

Di dalam al-Quran terdapat 32 ayat yang menyebut perkataan 'laut' dan 13 perkataan 'darat'. Allah SWT berfirman dalam Surah an-Nahl (16) ayat 14:

وَهُوَ الَّذِي سَخَّرَ الْبَحْرَ لِتَأْكُلُوا مِنْهُ لَحْمًا
ظَرِيرًا وَتَسْتَخْرِجُوا مِنْهُ حِلْيَةً تُلْبِسُونَهَا وَتَرَى
الْفُلْكَ مَوَاحِرَ فِيهِ وَلِتَبْغُوا مِنْ فَضْلِهِ
وَلَعَلَّكُمْ تَشْكُرُونَ

١٤

Maksudnya: Dan Dia lah yang memudahkan laut, supaya kamu dapat makan daripadanya daging yang lembut hidup-hidup, dan dapat pula mengeluarkan daripadanya benda-benda perhiasan untuk kamu memakainya dan (selain itu) engkau melihat pula kapal-kapal belayar padanya; dan lagi supaya kamu dapat mencari rezeki dari limpah kurniawinya; dan supaya kamu bersyukur. (14)

Ayat di atas menjelaskan bahawa Allah SWT telah **menundukkan lautan dan ombak untuk hamba-hamba-Nya**. Allah SWT menciptakan ikan-ikan, lalu menghalalkannya untuk dijadikan sumber makanan manusia. Allah SWT juga menciptakan mutiara dan pelbagai perhiasan yang berharga yang mudah dikeluarkan oleh manusia. Allah SWT juga telah

menundukkan lautan agar kapal-kapal boleh belayar dari satu negara ke negara yang lain membawa barang dagangan. Begitulah ayat tersebut menjelaskan tentang nikmat kejadian lautan.

Allah SWT juga berfirman dalam Surah an-Nur (24) ayat 40:

أَوْ كَظُلْمَتِ فِي بَحْرٍ لُّبْجِي يَغْشَلُهُ مَوْجٌ مِّنْ
فَوْقِهِ مَوْجٌ مِّنْ فَوْقِهِ سَحَابٌ ظُلْمَتِ بَعْضُهَا
فَوْقَ بَعْضٍ إِذَا أَخْرَجَ يَدَهُ وَلَمْ يَكُدْ يَرَهَا وَمَنِ
لَمْ يَجْعَلِ اللَّهُ لَهُ نُورًا فَمَا لَهُ وَمِنْ نُورٍ ﴿٤٠﴾

Maksudnya: Atau (orang kafir itu keadaannya) adalah *umpama* keadaan (orang yang di dalam) gelap-gelita di lautan yang dalam, yang diliputi oleh ombak bertindih ombak; di sebelah atasnya pula awan tebal (demikianlah keadaannya) gelap-gelita berlapis-lapis - apabila orang itu mengeluarkan tangannya, ia tidak dapat melihatnya sama sekali. Dan (ingatlah) sesiapa yang tidak dijadikan Allah menurut undang-undang peraturanNya mendapat cahaya (*hidayah petunjuk*) maka ia tidak akan beroleh sebarang cahaya (yang akan memandunya ke jalan yang benar). (40)

Ayat di atas menjelaskan tentang **kegelapan yang berada di dasar lautan yang mustahil terdapat cahaya**. Menurut ahli sains, manusia tidak mampu

menyelam sehingga 40 meter ke bawah tanpa bantuan peralatan.

Namun dengan perkembangan sains dan teknologi, manusia kini sudah boleh meneroka keadaan lautan yang indah dengan kehidupan di dasarnya walau sedalam 200 meter dengan penciptaan tangki gas dan kapal selam. Allah SWT berfirman lagi dalam Surah asy-Syura (42) ayat 32:

وَمِنْ عَائِتَةِ الْجُوَارِ فِي الْبَحْرِ كَالْأَعْلَمِ

Maksudnya: *Dan di antara tanda-tanda kekuasaan-Nya ialah kapal-kapal (yang besar tinggi) seperti gunung, belayar laju merempuh lautan. (32)*

Ayat di atas menjelaskan lagi tentang tanda-tanda kebesaran Allah SWT yang dapat kita lihat dari adanya **kapal dan bahtera yang besar dan berat dengan segala isinya boleh terapung di lautan luas.** Semuanya amat mudah bagi Allah SWT.



Gambar 4 : Bahtera Boleh Terapung di Lautan Dengan Kehendak Allah SWT

Tanda-tanda kebesaran Allah SWT dalam al-Quran yang selanjutnya berkaitan dengan lautan adalah adanya **pembatas antara air sungai dan laut**. Perkara yang pelik pada logik akal air sungai dan air laut tidak bercampur tatkala bertemu. Hal ini dijelaskan dalam Surah an-Naml (27) ayat 61:

أَمَّنْ جَعَلَ الْأَرْضَ قَرَارًا وَجَعَلَ خِلَلَهَا أَنْهِرًا
وَجَعَلَ لَهَا رَوَسِيٌّ وَجَعَلَ بَيْنَ الْبَحْرَيْنِ حَاجِرًا
أَإِلَهٌ مَعَ اللَّهِ بُلْ أَكُثُرُهُمْ لَا يَعْلَمُونَ ﴿٦١﴾

Maksudnya; Atau siapakah yang telah menjadikan bumi tempat penetapan dan telah menjadikan sungai-sungai di antara bahagian-bahagiannya dan telah

menjadikan untuknya gunung-ganang yang menetapnya; dan juga telah menjadikan di antara dua laut (yang masin dan yang tawar) sekat (semula jadi) yang memisahnya? Adakah sebarang tuhan yang lain bersama-sama Allah SWT? (Tidak!) bahkan kebanyakan mereka (yang musyrik itu) tidak mengetahui. (61)

Berdasarkan ayat tersebut, penemuan sains juga telah membuktikan bahawa salah satu sifat lautan adalah saling bertemu, akan tetapi tidak bercampur antara satu sama lain. Apabila dua lautan bertemu, akan wujud pemisah di antara dua lautan tersebut. Pemisah yang wujud antara dua lautan yang bertemu ini membuktikan kekuasaan Allah SWT.

Walaupun terdapat banyak ombak besar, arus yang kuat dan air pasang surut, namun air dua lautan ini tidak akan bercampur. Hal ini disebabkan oleh daya fizikal yang dipanggil “tekanan permukaan” akibat daripada perbezaan ketumpatan antara kedua lautan tersebut dan menyebabkan air tidak bercampur. Seterusnya ialah air sungai tidak bercampur dengan air laut. Sifat-sifat yang berbeza antara air tawar dan air masin menjadikan dua jenis air ini tidak bercampur dalam keadaan air tersebut tidak bercampur ianya membentuk lapisan-lapisan

Lautan
ditundukkan
untuk hamba-
Nya.

Kegelapan di
dasar lautan
mustahil terdapat
cahaya.

Bahera dengan
segala isinya
boleh terapung
di lautan luas.

Pembatas antara
air sungai dan
laut.

Rajah 2 : Tanda Kebesaran Allah SWT Melalui
Penciptaan Lautan.



Gambar 5 : Keajaiban Ciptaan Allah SWT Dua Lautan
Bertemu tetapi Tidak Bercampur

1.2.3 Kejadian Burung-burung di Langit

Tanda-tanda kebesaran Allah SWT yang berikutnya adalah adanya burung-burung yang berterbang di langit dengan bebas. Allah SWT berfirman dalam Surah an-Nahl (16) ayat 79:

أَلَمْ يَرَوْا إِلَى الظُّرُفِ مُسَخَّرَاتٍ فِي جَوَّ السَّمَاءِ مَا يُمْسِكُهُنَّ إِلَّا اللَّهُ أَنَّ فِي ذَلِكَ لَآيَاتٍ لِّقَوْمٍ

يُؤْمِنُونَ ٧٩

Maksudnya: “Tidakkah mereka memperhatikan burung-burung yang dimudahkan terbang melayang-layang di angkas?. Tiada yang menahan mereka (dari jatuh) melainkan Allah; Sesungguhnya pada yang demikian itu, ada tanda-tanda (yang membuktikan kekuasaan Allah) bagi orang yang beriman. (79)

Melalui ayat di atas, **keupayaan burung untuk mengawal sayap dan pergerakan** merupakan tanda-tanda kekuasaan Allah SWT. Menurut Ibn Kathir kelakuan terbang burung tersebut adalah dalil menunjukkan bahawa Allah SWT mengingatkan hamba-Nya untuk memerhatikan bagaimana Allah SWT menjadikan burung terbang di udara dengan kedua sayapnya. Tiada yang memegangnya melainkan Allah SWT dengan kekuasaan-Nya untuk menerbangkannya dengan mudah.

Pakar Neurosains juga menjelaskan mekanisme bagi kelakuan terbang melalui koordinasi laluan menurun sistem motor. Burung mempunyai sistem saraf pusat yang sangat baik. Struktur otak serebelum yang kompleks dan lobus optik yang besar adalah penting bagi kawalan badan dan sayapnya serta ketajaman penglihatan ketika bergerak.



Gambar 6 : Kerangka Tulang Merpati

Allah SWT menyeru manusia supaya melihat dan berfikir tentang kejadian burung yang terbang bebas di angkasa, sesekali menebarkan sayapnya dan sesekali menutupnya, lalu ia terapung-apung di angkasa. Ia tidak jatuh ke bawah sebagaimana objek lain yang

pantas direntap graviti bumi lalu terjatuh ke bawah. Burung tersebut seolah-olah **tidak terikat dengan hukum graviti**, malah dapat menembusi tarikan graviti tersebut.

Al-Qurtubi menjelaskan bahawa bumi yang terbentang luas ini dipermudahkan kepada manusia untuk manusia mengambil manfaat di permukaannya, tetapi angkasa pula telah dipermudahkan kepada burung-burung untuk bebas ke sana ke mari menebar dan menutup sayapnya. Kesemua ini apabila direnung dan difikirkan akan menampakkan kekuasaan Allah SWT yang mutlak, segala sesuatu berada di bawah pentabiran dan kehendak-Nya.



Gambar 7: Allah SWT Menciptakan Burung Memiliki Sayap untuk Terbang di Udara

1.2.4 Kejadian Siang dan Malam

Allah SWT berfirman dalam Surah al-Fussilat (41) ayat 37;

وَمِنْ عَائِتِهِ الْيَلْ وَالنَّهَارُ وَالشَّمْسُ وَالقَمَرُ لَا
سَجَدُوا لِلشَّمْسِ وَلَا لِلْقَمَرِ وَأَسْجَدُوا لِلَّهِ
ۚ
الَّذِي خَلَقُهُنَّ إِنْ كُنْتُمْ إِيمَانًا تَعْبُدُونَ

Maksudnya: Dan sebahagian dari tanda-tanda kekuasaanNya ialah malam dan siang, matahari, dan bulan. Janganlah bersujud kepada matahari dan janganlah pula kepada bulan,dan sebaliknya hendaklah kamu sujud kepada Allah yang mencitakannya, kalua betulah kamu hanya beribadat kepada Allah. (37)

Ayat di atas menjelaskan malam dan siang merupakan tanda-tanda yang membuktikan bahawa alam ini pasti diatur oleh suatu zat yang amat luar biasa (Allah SWT). Di dalam al-Quran, malam dan siang sering disebut dan diulang-ulang dalam beberapa ayat-ayat-Nya.


Selain ayat di atas, kejadian malam dan siang turut dijelaskan dalam Surah al-Furqan (25) ayat 47;

وَهُوَ الَّذِي جَعَلَ لَكُمُ الْيَلَ وَالنَّهَارَ سُبَاتًا
ۚ
وَجَعَلَ النَّهَارَ نُشُورًا

Maksudnya: “Dan Dia lah Tuhan yang menjadikan malam untuk kamu sebagai pakaian, dan menjadikan tidur untuk berhenti rehat serta menjadikan siang untuk keluar mencari rezeki. (47)

Ayat ini pula membicarakan tentang manfaat yang diperolehi oleh manusia dari terbit dan terbenamnya matahari, iaitu adanya siang dan malam. Allah SWT menciptakan kegelapan malam dari remang-remang (redup) hingga sangat kelam, kemudian disusuli sedikit demi sedikit dengan datangnya terang, serupa juga keadaan bayangan yang didahului oleh gelap hingga ia menghilang dengan datangnya terang.

Inilah di antara bukti-bukti keEsaan Allah SWT dan kekuasaan-Nya yang dijadikan untuk manusia. Keadaan malam dengan kegelapannya sebagai pakaian yang menutupi diri dan menjadikan tidur sebagai pemutus segala kegiatan manusia sehingga mereka dapat beristirahat untuk memulihkan tenaga kembali, agar waktu siangnya membolehkan mereka bertenaga untuk bertebaran mencari rezeki.



Gambar 8 : Kejadian Siang dan Malam Sebagai Keseimbangan Hidup Manusia

1.2.5 Kejadian Tumbuh-tumbuhan yang Subur

Allah SWT telah berfirman dalam Surah al-Hajj (22) ayat 5:

..وَتَرَى الْأَرْضَ هَامِدَةً فَإِذَا آنَزْلْنَا عَلَيْهَا الْمَاءَ

﴿۝﴾ أَهْتَرَثُ وَرَبَّتُ وَأَثْبَتُ مِنْ كُلِّ رَوْجٍ بَهِيجٍ

Maksudnya: ...Dan (ingatlah satu bukti lagi); Engkau melihat bumi itu kering, kemudian apabila Kami menurunkan

*hujan menimpanya, bergeraklah tanahnya
(dengan tumbuh-tumbuhan yang merecup
tumbuh), dan gembur membusutlah ia,
serta ia pula menumbuhkan berjenis-jenis
tanaman yang indah permai. (5)*

Ayat di atas menyuruh kita memerhatikan bunga-bunga yang berwarna-warni dan pepohonan yang indah lantaran hujan yang turun menyirami bumi daripada langit dengan kekuasaan Allah SWT. Hal ini dikukuhkan lagi dengan Firman Allah SWT dalam Surah al-Qaaf (50) ayat 11:

رَزْقًا لِلْعِبَادِ وَأَحْيَيْنَا بِهِ بَلْدَةً مَيِّتَّا كَذَلِكَ

ۚ أَخْرُوجُ

Maksudnya: (Semuanya itu) sebagai rezeki bagi hamba-hamba Kami. Dan lagi Kami telah hidupkan dengan air itu bumi yang mati; demikianlah pula keadaan keluarnya (orang yang mati dari kubur setelah dibangkitkan hidup semula). (11)

Kekuasaan Allah SWT menurunkan hujan untuk menyuburkan muka bumi tidak dapat disangkal lagi oleh sains kerana tumbuh-tumbuhan memerlukan air untuk terus hidup dan menjadi sumber makanan kepada manusia.



Gambar 9 : Penciptaan Hujan yang Menyuburkan Muka Bumi

Kesimpulannya, kejadian alam ini merupakan bukti kekuasaan dan kewujudan Allah SWT sebagai Pencipta. Penjelasan al-Quran berkaitan dengan alam ini adalah mustahil dicipta oleh manusia bernama Muhammad SAW kerana pada masa itu, ilmu sains masih belum berkembang. Namun perkara tersebut dapat dibuktikan pada zaman ini apabila teknologi semakin berkembang dan maklumat mudah diperolehi di hujung jari.

BAHAGIAN 2

AKIDAH DALAM KEHIDUPAN

2. AKIDAH DALAM KEHIDUPAN

Perbincangan akidah adalah berkaitan dengan Ilmu Tauhid. Akidah dinamakan dengan Tauhid kerana perbahasannya mengenai Tauhid atau pengEsaan kepada Allah SWT yang Esa. Oleh itu, akidah merupakan ilmu yang paling penting sebelum mempelajari ilmu-ilmu yang lain.

2.1 Kepentingan Akidah dalam Kehidupan

Akidah adalah merupakan ilmu yang paling penting dan utama sebelum mempelajari ilmu-ilmu yang lain. Hal ini kerana;

2.1.1 Akidah Ialah Komponen Utama dalam Islam.

Ia perlu dipelajari dan dihayati terlebih dahulu sebelum ilmu-ilmu yang lain. Hal ini kerana penghayatan terhadap akidah Islam akan memantapkan iman seseorang untuk mudah mengamalkan ajaran-Nya. Akidah juga merupakan keyakinan dan kepercayaan. Ia menentukan arah tujuan perjalanan hidup seseorang. Akidah yang benar dan selamat ialah akidah Islam, iaitu akidah yang meyakini bahawa hanya Allah SWT yang menciptakan seluruh kejadian di muka bumi ini yang mengandungi suruhan dan larangan-Nya agar manusia berada di landasan kehidupan yang benar.

2.1.2 Akidah Islam Membentuk Keimanan Seseorang Terhadap Allah SWT.

Asas utama dalam akidah Islam terkandung dalam kalimah syahadah iaitu kalimah *La Ilaha Illa Allah* yang bermaksud tiada Tuhan yang berhak disembah melainkan Allah SWT. Kalimah ini mengandungi dua perkara iaitu berkaitan dengan penafian bahawa tiada tuhan lain di dunia ini manakala perkara kedua berkaitan dengan pengakuan iaitu hanya Allah SWT yang berhak untuk disembah. Penafian dan pengakuan ini mestilah merangkumi hati dan dibuktikan dengan amalan ibadah yang telah ditetapkan. Kemudian menjauhkan diri dari perbuatan-perbuatan syirik dan menyekutukan Allah SWT. Selain itu, perlu berusaha mengerjakan segala perintah Allah SWT dan menjauhkan diri daripada larangan-Nya.

2.1.3 Akidah Akan Menentukan Arah Tujuan Hidup Manusia.

Ketika Islam datang, akidah manusia dalam keadaan yang tidak menentu. Ia diamalkan berdasarkan sangkaan, dongengan, falsafah yang menyeleweng, khayalan, khurafat dan tasyul. Keadaan seumpama itu tidak dapat memberi matlamat dalam kehidupan dan manusia tidak boleh hidup dalam ketenangan dan kebahagiaan di dunia.

2.1.4 Akidah Juga Menjadi Teras kepada Balasan Baik dan Buruk di Akhirat.

Walaupun seseorang itu banyak melakukan amal kebaikan namun tanpa akidah yang benar, segala amalan baik ketika di dunia akan menjadi sia-sia.

2.1.5 Akidah Islam Meningkatkan Kualiti Hidup

Akidah Islam jika difahami dan dihayati akan meningkatkan kualiti hidup manusia dan menjadi sumber kekuatan dalam menghadapi cabaran dan dugaan hidup di dunia.

2.2 Kesan Akidah Islam dalam Kehidupan Seseorang Muslim

Akidah Islam datang daripada Allah SWT melalui wahyu untuk menjadi pegangan dan panduan umat manusia. Lantaran itu akidah Islam memenuhi keperluan manusia yang sememangnya perlu dipandu, diatur dan didisiplinkan agar dapat melaksanakan kehidupannya sesuai dengan matlamat penciptaannya terutama untuk keperluan di alam akhirat.

Manusia memerlukan kepada akidah atau tauhid yang merupakan dasar utama agar dapat melalui kehidupan yang diredayai Allah SWT. Sekiranya tiada akidah maka hidup tidak lagi sempurna. Kesannya hilang keseimbangan dalam kehidupan dan menyebabkan kekacauan dalam kehidupan, tidak memperolehi ketenangan hidup. Akhirnya, tidak ada matlamat hidup sebagai seorang Muslim.

Akidah merupakan suatu perkara yang penting dan utama. Ini kerana manusia adalah hamba Allah SWT yang Maha Esa. Seseorang tidak akan menjadi sebenar-benar hamba Allah SWT yang Maha Agung kecuali apabila dapat mengerti dan memahami secara mendalam kalimah *La Ilaha Illa Allah* yang bermaksud: tidak ada Tuhan selain Allah SWT, tidak ada syariat kecuali datang daripada-Nya, tidak ada kekuasaan selain kekuasaan-Nya, segala kekuasaan adalah milik mutlak Allah SWT yang Maha Agung. Akidah merupakan satu perkara yang dikehendaki oleh Islam sebagaimana ia dapat menyamakan dan menyatukan orang Melayu, Cina, India, Arab, Roman, Parsi, dan keturunan lain yang berbeza warna kulit di bawah satu naungan dan kekuasaan Allah SWT.

Seseorang manusia itu bila berpegang teguh kepada akidah yang benar, kuat dan teguh, ia akan menjadikan seseorang itu bersikap baik serta taat melakukan perintah Allah SWT. Apabila seseorang itu tidak menyalahi perintah Allah SWT, semua perbuatan yang dilakukan adalah kerana mencari reda Allah SWT yang menganjurkan kepada kebaikan dan kebahagiaan di dunia dan akhirat. Oleh itu, akidah yang benar akan memberi kesan dalam kehidupan seseorang Muslim iaitu;

2.2.1 Berakhlak Mulia dan Baik

Rasulullah SAW diutuskan oleh Allah SWT kepada umat ini selain daripada menyeru umat kepada mengabdikan diri kepada Allah SWT, Rasulullah SAW juga diutuskan untuk memperbaiki akhlak umat manusia. Sebagaimana dalam Surah al-Qalam (68) ayat 4:

وَإِنَّكَ لَعَلَىٰ خُلُقٍ عَظِيمٍ

Maksudnya: *Dan bahawa sesungguhnya engkau mempunyai akhlak yang amat mulia. (4)*

Akidah merupakan sumber akhlak dan budi pekerti seseorang Islam, ia juga sumber bagi setiap apa yang dilakukan diasaskan dengan kalimah *La Ilaha Illa Allah* di dalam hati. Mereka yang melafazkan dengan lafaz tersebut dengan keimanan yang benar tidak tunduk kepada seseorang yang zalim, orang kafir, tidak reda terhadap sebarang kefasikan (berterusan dalam melakukan dosa), dan tidak menolong orang menderhana kepada Allah SWT. Tidak melakukan sesuatu kecuali kerana Allah SWT, tidak marah kecuali kerana Allah SWT semata-mata.

Antara contoh akhlak yang baik adalah benar dan jelas dalam pertuturan, melaksanakan amanah, bersemangat dan bercita-cita tinggi, memelihara lidah dan membersihkan diri dari hasad dengki dan dendam. Dengan akhlak yang baik tersebut akan dapat menenangkan hati seorang mukmin dan tetap dalam prinsip kehidupan yang benar seperti yang dianjurkan dalam Islam.

2.2.2 Sikap Suka Membantu dan Pemurah

Keimanan yang kuat dapat menjadikan seorang itu pemurah dan bersikap pemberi tanpa ada kepentingan yang lain. Dalam erti kata lain tidak ingin memperolehi nikmat dengan segera di dunia ini. Ini kerana tujuannya adalah semata-mata untuk mencapai keredaan Allah SWT. Apabila seseorang itu benar-benar tulus dalam melaksanakan syariat Islam dalam kehidupan, mereka tidak merasa lemah dan akan berusaha bersungguh-sungguh untuk melakukan kebaikan di dunia walaupun terpaksa mengorbankan setiap apa yang dimiliki dalam kehidupan ini.

Mereka berjihad pada jalan Allah SWT dengan hartanya dan dirinya, semata-mata dengan tulus serta ikhlas kerana Allah SWT. Sebagaimana firman Allah SWT dalam Surah al-Hujurat (49) ayat 15:

إِنَّمَا الْمُؤْمِنُونَ الَّذِينَ ظَاهَرُوا بِاللَّهِ وَرَسُولِهِ ثُمَّ
لَمْ يَرْتَأُوا وَجَهَدُوا بِأَمْوَالِهِمْ وَأَنفُسِهِمْ فِي سَبِيلٍ
اللَّهُ أَوْلَىٰ بِهِمْ هُمُ الصَّادِقُونَ ١٥

Maksudnya: Sesungguhnya orang yang sebenar-benarnya beriman hanyalah orang yang percaya kepada Allah dan Rasul-Nya, kemudian mereka (terus percaya dengan) tidak ragu-ragu lagi, serta mereka berjuang dengan harta benda dan jiwa mereka pada jalan Allah; mereka itulah orang yang benar (pengakuan imannya). (15)

Orang mukmin yang sempurna keimanannya ialah mereka yang tidak syak dan ragu-ragu, tetap di atas kebenaran Allah SWT semata-mata. Mereka mengorbankan tenaga dan harta demi ketaatan kepada Allah SWT dan keredaan-Nya. Mereka itulah sebenar-benar mukmin. Dengan ini mereka yang memelihara keimanannya terhadap Allah SWT, mereka tidak akan melakukan sesuatu perkara hanya untuk mendapat balasan dunia.

Malah sentiasa bertekad akan menghadapi pelbagai cabaran demi melaksanakan apa yang diperintah oleh Allah SWT. Sebagai ganjaran, mereka akan memperolehi janji Allah SWT dengan balasan yang baik di akhirat nanti. Dengan keteguhan akidah, akan dapat melahirkan seseorang yang bersikap suka berkorban kerana Allah SWT. Jika seseorang itu bersikap demikian dalam kehidupan, maka kehidupannya akan menjadi tenteram, bahagia dan harmoni.

2.2.3 Berperikemanusiaan

Kesan keteguhan akidah juga dapat menjadikan seseorang itu berperikemanusiaan atau berbuat baik dalam pergaulan dengan keluarga dan masyarakat. Allah SWT menyuruh umatnya supaya berbuat baik

terhadap kedua ibu bapa lebih dari yang lain kerana kedua ibu bapa berperanan penting dalam kehidupan, kerana mereka lahirnya seseorang itu di dunia. Allah SWT berfirman dalam Surah al-Isra' (17) ayat 23:

وَقَضَىٰ رَبُّكَ أَلَا تَعْبُدُوا إِلَّا إِيَّاهُ وَبِالْوَالِدَيْنِ
إِحْسَنَّا إِمَّا يَبْلُغُنَّ عِنْدَكُمُ الْكِبَرَ أَهْدُهُمَا أُوْ
كَلَّا هُمَا فَلَا تَقْلِ لَهُمَا أَفْٰ وَلَا تَنْهَهُمَا وَقُلْ
لَهُمَا قَوْلًا كَرِيمًا ﴿٢٣﴾

Maksudnya: Dan Tuhanmu telah perintahkan, supaya Engkau tidak menyembah melainkan kepadaNya semata-mata, dan hendaklah Engkau berbuat baik kepada ibu bapa. jika salah seorang dari keduanya, atau keduaduanya sekali, sampai kepada umur tua dalam jagaan dan peliharaanMu, maka janganlah Engkau berkata kepada mereka (sebarang perkataan kasar) sekalipun perkataan "Ha", dan janganlah Engkau menengking menyergah mereka, tetapi katakanlah kepada mereka perkataan yang mulia (yang bersopan santun). (23)

Allah SWT mengaitkan ibadat kepada-Nya dengan berbuat baik terhadap kedua ibu bapa untuk menunjukkan hak mereka berdua yang besar terhadap anak. Ini kerana mereka berdua merupakan asbab kewujudan anak serta dapat meneruskan kehidupan. Oleh kerana ihsan atau kebaikan kedua ibu bapa itu

terhadap anak sangat besar, maka wajib keatas anak-anak berbuat ihsan kembali terhadap kedua ibu bapa. Dengan ini, wajib keatas orang mukmin untuk berusaha menjaga kedua ibu bapa dengan baik, elak daripada membuatkan mereka berdua berasa sedih. Perasaan berperikemanusiaan ada dalam diri seseorang, akan melahirkan perasaan saling menghormati serta menyayangi di antara satu sama lain.

2.2.4 Lemah Lembut

Kesan iman dalam diri seseorang dapat mendorongnya kepada suka melakukan kebaikan terhadap orang lain sama ada kaum kerabat atau bukan kerabat, kepada jiran atau bukan jiran. Allah SWT berfirman, dalam Surah an-Nisa' (4) ayat 36 :

وَاعْبُدُوا اللَّهَ وَلَا تُشْرِكُوا بِهِ شَيْئاً
وَبِالْوَالِدِينِ إِحْسَنَا وَبِذِي الْقُرْبَى وَالْمُتَّقِيمِ
وَالْمَسَكِينِ وَالْجَارِ ذِي الْقُرْبَى وَالْجَارِ الْجُنُبِ
وَالصَّاحِبِ بِالْجُنُبِ وَابْنِ السَّبِيلِ وَمَا مَلَكَتْ
أَيْمَانُكُمْ إِنَّ اللَّهَ لَا يُحِبُّ مَنْ كَانَ مُخْتَالاً

فَخُورًا

Maksudnya: Dan hendaklah kamu beribadat kepada Allah dan janganlah kamu sekutukan Dia dengan sesuatu apa jua; dan hendaklah kamu berbuat baik

kepada kedua ibu bapa, dan kaum kerabat, dan anak-anak yatim, dan orang yang miskin, dan jiran tetangga yang dekat, dan jiran tetangga yang jauh, dan rakan sejawat, dan orang musafir yang terlantar, dan juga hamba yang kamu miliki. Sesungguhnya Allah tidak suka kepada orang yang sombang, takbur dan membangga-banggakan diri; (36)

2.2.5 Bercakap Benar dan Melakukan Pekerjaan yang Baik

Bercakap benar merupakan suatu sifat terpuji serta digalakkan dalam Islam. Bahkan ia merupakan sebaik-baik sifat manusia terhadap manusia yang lain. Islam menggalakkan bercakap benar serta menjelaskan bahawa mereka yang bersifat sedemikian akan dimasukkan oleh Allah SWT ke dalam syurga-Nya. Firman Allah SWT dalam Surah al-Mâ'idah (5) ayat 119:

فَالَّهُ هَذَا يَوْمٌ يَنْفَعُ الصَّدِيقِينَ صِدْقُهُمْ لَهُمْ
جَنَّتُ تَحْرِي مِنْ تَحْتِهَا الْأَنْهَرُ خَالِدِينَ فِيهَا
أَبَدًا رَضِيَ اللَّهُ عَنْهُمْ وَرَضُوا عَنْهُ ذَلِكَ الْفُورُ

الْعَظِيمُ ۖ

Maksudnya: Allah berfirman : “Inilah hari (kiamat) yang (padanya) orang-orang yang benar (pada tutur kata dan amal perbuatan) mendapat manfaat dari kebenaran mereka; mereka beroleh

Syurga-syurga yang mengalir di bawahnya beberapa sungai, mereka kekal di dalamnya selama-lamanya. Allah reda akan mereka dan mereka pula reda akan Dia. Itulah kejayaan yang amat besar". (119)

Allah SWT menyebut amal soleh beberapa kali dalam al-Quran. Ini jelas membuktikan bahawa pekerjaan yang baik atau amal soleh itu sangat penting, serta mempunyai peranan yang besar dalam kehidupan manusia sama ada di dunia atau akhirat.

Al-Quran ketika menyebut tentang amal soleh tidak menentukan ia adalah ibadat sahaja, malah setiap pekerjaan yang baik serta dilakukan oleh manusia di dunia ini seperti pertanian dan pertukangan termasuk dalam amal soleh. Petani yang bekerja dengan kemahirannya dalam sawah juga boleh dikatakan beramal soleh, kerana dapat memberi faedah yang banyak terhadap dunia seperti menyelesaikan masalah kekurangan makanan dalam masyarakat.

2.2.6 Menggunakan Akal Secara Benar

Islam sangat memberi keutamaan terhadap akal, seseorang itu perlulah menggunakan akal secara benar ke arah melakukan kebaikan, bagi mengkaji dan membuat penyelidikan di pelbagai bidang yang akhirnya akan membawa seseorang itu sampai kepada peringkat mengenal Allah SWT, Pencipta sekalian alam ini.

Dalam al-Quran terdapat sebanyak 17 ayat yang menggalakkan manusia supaya berfikir terhadap diri dan kejadiannya. Semua ini dapat membuktikan bahawa kepentingan menggunakan akal untuk berfikir

sehingga mengenali Allah SWT, Pencipta makhluk ini. Antara firman Allah SWT yang menyeru manusia supaya berfikir, sepertimana firman-Nya, dalam Surah al-Baqarah (2) ayat 219:

٤٣ ﴿ يَسْأَلُونَكَ عَنِ الْحُمْرِ وَالْمَيْسِرِ قُلْ فِيهِمَا إِنَّمَا
كَبِيرٌ وَمَنَفِعٌ لِلنَّاسِ وَإِنْهُمْ مَا أَكْبَرُ مِنْ
نَفْعِهِمَا ۝ يَسْأَلُونَكَ مَاذَا يُنْفِقُونَ قُلِ الْعَفْوُ
كَذَلِكَ يُبَيِّنُ اللَّهُ لَكُمُ الْآيَتِ لَعَلَّكُمْ

٢١٩ تَتَكَرُّونَ

Maksudnya: Mereka bertanya kepadamu (Wahai Muhammad) mengenai arak dan judi. katakanlah: "Pada keduanya ada dosa besar dan ada pula beberapa manfaat bagi manusia tetapi dosa keduanya lebih besar daripada manfaatnya dan mereka bertanya pula kepadamu: apakah yang mereka akan belanjakan (dermakan)? katakanlah: "Dermakanlah apa-apa yang berlebih dari keperluan (kamu). Demikianlah Allah menerangkan kepada kamu ayat-ayat-Nya (keterangan-keterangan hukum-Nya) supaya kamu berfikir: (219)

2.2.7 Menjalinkan Persaudaraan dalam Islam Hanya Kerana Allah SWT

Jika seseorang Islam itu mengikuti ajaran al-Quran serta melaksanakan dalam kehidupan mereka dengan

baik, kesannya akan melahirkan budi pekerti atau akhlak yang baik dalam pergaulan bersama masyarakat dengan berdasarkan kepada asas akidah yang sahih. Dengan ini, lahirlah perasaan yang lemah lembut terhadap satu sama lain, menghormati sesama manusia, tidak melakukan sesuatu yang dapat menyakiti atau menyusahkan orang lain. Tidak melakukan perbuatan yang dapat menjatuhkan maruah seseorang atau menahan dan menyekat kebebasan seseorang.

Seterusnya, jadilah mereka bersaudara, berkasi sayang, dan berlemah lembut, bersimpati terhadap yang lain, menderita dengan penderitaan orang lain. Allah SWT berfirman dalam Surah al-Hujurat (49) ayat 10:

إِنَّمَا الْمُؤْمِنُونَ إِخْرَجُوا فَأَصْلَحُوا بَيْنَ أَخْوَيْهِمْ
وَاتَّقُوا اللَّهَ لَعَلَّكُمْ تُرْحَمُونَ

Maksudnya: Sebenarnya orang yang beriman itu adalah bersaudara, maka damaiakanlah di antara dua saudara kamu (yang bertelingkah) itu; dan bertaqwalah kepada Allah supaya kamu beroleh rahmat. (10)

Dengan ini jelas bahawa persaudaraan dalam Islam lebih kuat daripada persaudaraan dari segi nasab dan keturunan, tidak dapat dikatakan persaudaraan pada nasab jika tidak berukhuwah atau bersaudara dalam Islam. Sungguh besar ertinya persaudaraan dari segi agama, kerana Islam itu sendiri sentiasa mengajak manusia untuk melakukan kebaikan. Dengan adanya persaudaraan, maka lahirlah sifat tolong-menolong di

antara satu sama lain, berkongsi gembira dan sedih, tidak melampaui batas, serta tidak berlaku zalim, bersikap lemah lembut serta berkasih sayang antara satu sama lain.

2.3 Hubungan Akidah dengan Syariat dan Akhlak

Hubungan Akidah dengan Syariat dan Akhlak adalah sangat penting. Ketiga-tiga perkara ini akan menjadikan seorang Muslim sempurna akidahnya, mantap dan teguh pegangannya sehingga mampu menjadi seorang mukmin yang bertakwa, beramal soleh, dan berakhhlak mulia. Keteguhan akidah akan menjadikan umat Islam kuat, bersatu teguh, dan bersemangat. Sebaliknya, kelemahan akidah boleh menyebabkan umat Islam menjadi lemah, berpecah belah dan lesu.

Akidah dari sudut bahasa bermaksud simpul atau ikat. **Maksud dari sudut istilah** ialah sesuatu yang diikat dan disimpul di dalam hati dan jiwa serta apa yang dipegang oleh seseorang sebagai agama dengan pegangan yang benar dan selamat daripada sebarang keraguan.

Syariat dari sudut bahasa ialah menempuh, menjelaskan dan menunjukkan jalan. **Dari sudut istilah** ialah pelbagai hukum dan ketentuan yang telah ditetapkan oleh Allah SWT untuk hamba-hamba-Nya.

Hukum-hukum Islam mengatur hubungan sesama manusia dalam kehidupan. Manakala penetapan aspek perundangan, membentuk disiplin kehidupan sebagai seorang Muslim. Selain itu, syariat juga menjelaskan hukum wajib, sunat, haram, harus dan makruh serta perkara yang disuruh dan dilarang oleh Allah SWT.

Akhlak dari sudut bahasa bermaksud tabiat, perangai dan kebiasaan. **Dari sudut istilah** bermaksud akhlak adalah

perbuatan, perangai dan tingkah laku yang baik. Sebagaimana dalam Surah al-Qalam (68) ayat 4:


وَإِنَّكَ لَعَلَىٰ خُلُقٍ عَظِيمٍ

Maksudnya: *Dan bahawa sesungguhnya Engkau mempunyai akhlak Yang amat mulia. (4)*

Ketiga-tiga perkara ini adalah berkaitan bagi melahirkan Muslim yang baik dan sempurna. Akidah merupakan perkara yang paling asas dan utama dalam keimanan seseorang. Orang yang mempunyai pegangan akidah yang kuat dan kukuh akan memahami dan beriman dengan apa jua perkara yang berkaitan dengan Allah SWT sama ada sifat Allah SWT, kekuasaan Allah SWT, janji Allah SWT dan lain-lain.

Syariat yang ditetapkan oleh Allah SWT adalah satu peraturan bertujuan untuk dijadikan panduan kepada umat manusia supaya hidup berlandaskan keredaan Allah SWT. Ini kerana setiap suruhan dan larangan Allah SWT mempunyai hikmah yang penting untuk membawa manusia ke jalan yang benar mengikut ajaran Islam. Apabila seseorang itu mempunyai akidah yang mantap dan kukuh, maka segala syariat yang diturunkan oleh Allah SWT akan dilaksanakan dengan penuh keyakinan dan keikhlasan tanpa mempertikaikannya.

Akhlik yang baik dan mulia adalah kerana seseorang itu mempunyai pegangan akidah yang kuat dan kukuh kepada Allah SWT. Sikap dan perbuatan yang baik, adalah hasil daripada kepatuhan melaksanakan peraturan yang disyariatkan oleh Allah SWT. Ini kerana akidah yang kuat mendorong seseorang itu melakukan perkara yang di sukai oleh Allah SWT.



Rajah 3: Asas Agama Islam

Ketiga-tiga perkara di atas adalah asas agama Islam yang wajib difahami, dihayati dan dilaksanakan supaya menjadi Muslim yang baik dan sempurna. Jika tidak ada salah satu daripadanya, maka kehidupan Muslim mudah dipengaruhi oleh perkara-perkara yang dibenci oleh Allah SWT serta dapat merosakkan akidah.

2.4 Akidah Ahli Sunah Wal Jamaah

Akidah Ahli Sunah Wal Jamaah merupakan pegangan yang dominan dalam kalangan masyarakat Islam seluruh dunia khususnya di rantau Asia Tenggara termasuk Malaysia. Malaysia menjadikan Akidah Ahli Sunah Wal Jamaah sebagai pegangan rasmi masyarakat Islam berdasarkan keputusan dan pengamalan Jawatankuasa Fatwa Majlis Kebangsaan dan para mufti serta ahli-ahli Jawatankuasa Fatwa Seluruh Malaysia dalam Muzakarah Khas Jawatankuasa Fatwa Majlis

Kebangsaan Bagi Hal Ehwal Ugama Islam Malaysia yang bersidang pada 5 Mei 1996, “*Umat Islam di Malaysia hendaklah hanya mengikut ajaran Islam yang berdasarkan pegangan Ahli Sunah Wal Jamaah dari segi Akidah, Syariah dan Akhlak*”.

Istilah Bahasa Arab iaitu Ahli Sunah Wal Jamaah berasal daripada dua patah perkataan iaitu, “Ahli Sunah” dan “Al-Jamaah” yang memberi maksud golongan yang mengikut pegangan Nabi SAW atau mengikuti jalan hidup Baginda SAW dan jemaah para sahabat terutamanya Khulafa’ Ar-Rasyidin yang dididik oleh Baginda SAW. Ajaran Ahli Sunah Wal Jamaah meliputi ajaran-ajaran Islam mengenai akidah, syariah dan akhlak yang dibawa semenjak zaman Nabi SAW serta para sahabat Baginda SAW.

Istilah Ahli Sunah Wal Jamaah diambil dan dirumus oleh ulama berdasarkan riwayat hadis riwayat al-Tirmizi (2641). Daripada Abdullah bin Amr RA bahawa Rasulullah SAW bersabda:

وَتَقْرِئُ أُمَّتِي عَلَى ثَلَاثٍ وَسَبْعِينَ مِلَّةً، كُلُّهُمْ فِي النَّارِ
إِلَّا مِلَّةٌ وَاحِدَةٌ، قَالُوا: وَمَنْ هِيَ يَا رَسُولَ اللَّهِ؟
قَالَ: مَا أَنَا عَلَيْهِ وَأَصْحَابِي

Bermaksud: “Dan akan berpecah umatku kepada 73 golongan. Semuanya akan dimasukkan ke dalam neraka melainkan satu golongan sahaja. Sahabat bertanya: Wahai Rasulullah SAW, siapakah mereka? Nabi SAW menjawab: Apa yang aku berada di atasnya dan juga sahabat-sahabatku.” (apa yang diajarkan oleh Rasulullah SAW dan yang diamalkan oleh para sahabat)

Begitu juga hadis yang diriwayatkan oleh Ibn Majah (3992), daripada ‘Auf bin Bin Malik RA bahawa Rasulullah SAW bersabda:

وَالَّذِي نَفْسُ مُحَمَّدٍ بِيَدِهِ لَتَقْرَأُنَّ أُمَّيَّةَ عَلَى ثَلَاثٍ
وَسَبْعِينَ فِرْقَةً، وَاحِدَةً فِي الْجَنَّةِ، وَثَيْتَانِ وَسَبْعُونَ فِي
النَّارِ، قِيلَ: يَا رَسُولَ اللَّهِ مَنْ هُمْ؟ قَالَ: الْجَمَاعَةُ

Bermaksud: “Dan demi jiwa Muhammad berada di tangan-Nya, akan berpecah umatku kepada 73 golongan. Satu golongan sahaja yang akan ke syurga dan 72 golongan lagi akan dimasukkan ke dalam neraka. Sahabat bertanya: Wahai Rasulullah SAW, siapakah mereka? Nabi SAW menjawab: al-Jamaah.”

Berdasarkan riwayat hadis tersebut, para ulama telah membuat kesimpulan bahawa akidah Ahli Sunah Wal Jamaah adalah satu pegangan yang berakar umbi dari ajaran yang dibawa oleh Rasulullah SAW dan para sahabat Baginda. Kemudian, disusun dengan lebih bersistem dan teguh oleh dua tokoh imam Ahli Sunah Wal Jamaah iaitu Imam Abu al-Hassan al-Ash’ari dan Imam Abu Mansur al-Maturidi. Akidah Ahli Sunah Wal Jamaah disifatkan sebagai ajaran yang betul, lurus, selamat, jelas dan tiada kekeliruan di dalamnya. Sementara ajaran-ajaran lain disifatkan sebagai ajaran yang keliru, menyeleweng dan mempunyai kecenderungan yang jauh daripada ajaran yang berasaskan al-Quran dan sunah.

2.4.1 Antara Ciri-ciri Pegangan Akidah Ahli Sunah Wal Jamaah

Pertama : Berpegang dan mentafsirkan hukum-hukum Islam berdasarkan kepada sumber perundangan

utama iaitu al-Quran, sunah, ijmak dan kias tanpa menolak atau mengurangkan peranan salah satu darinya.

- Ijmak : Suatu persetujuan atau persepakatan dari kalangan umat Nabi Muhammad SAW ke atas satu permasalahan dari isu-isu agama dan berlaku pada satu zaman dari zaman-zaman tertentu.
- Kias: Menyamakan suatu masalah atau perkara yang baharu atau terjadi masa kini dengan sesuatu yang terjadi pada zaman Nabi SAW.

Kedua : Berpegang kepada ajaran Islam yang meliputi perkara mengenai iman iaitu akidah, Islam iaitu syarak dan ihsan iaitu akhlak.

Ketiga : Berpegang kepada al-Quran yang dihimpunkan oleh para sahabat terutamanya al-Quran yang dikenali sebagai Mashaf Uthmani serta berpegang kepada sunah terutamanya hadis-hadis yang dihimpunkan oleh imam-imam besar hadis seperti Imam al-Bukhari, Imam Muslim, Imam Tirmizi, Imam Abu Daud, Imam an-Nasa'ie, Imam Ibnu Majah dan imam-imam lain yang diiktiraf.

Keempat : Percaya bahawa para sahabat kesemuanya bersikap benar dan adil tanpa mengkufurkan salah seorang dari mereka. Terutamanya, para khulafa ar-Rasyidin iaitu Saidina Abu Bakar as-Siddiq RA, Saidina Umar al-Khattab RA, Saidina Uthman bin Affan RA dan Saidina Ali bin Abi Talib RA.

Kelima : Percaya dan beriman kepada perkara ghaib terutamanya yang sabit melalui al-Quran dan sunah

seperti seksaan azab kubur, pembalasan syurga, neraka dan sebagainya.

Keenam : Tidak mengkufurkan saudara sesama Islam atau yang berkiblatkan Kaabah (ahli al-Qiblah) dengan mudah kecuali dengan pertimbangan ilmu atau hujah yang kuat dan sikap yang adil.

Ketujuh : Kesederhanaan dalam kepercayaan dan pengamalan iaitu tidak terlalu ekstrem dan tidak terlalu cuai.

Manakala fahaman-fahaman lain yang dipelopori oleh beberapa golongan seperti Syiah, Rafidhah, Khawarij, Qadariah, Murjiah, Jabariah dan sebagainya **telah menyalahi sebahagian atau semua** daripada perkara di atas. Seperti menolak al-Quran dan sunah, mentafsirkan Islam berdasarkan akal semata-mata dan kehendak nafsu, mengkufurkan para sahabat, bersikap ekstrem dan sebagainya. Justeru, fahaman dan ajaran seperti yang disebutkan di atas tertolak dan tidak tergolong di dalam kelompok Ahli Sunah Wal Jamaah. Firman Allah SWT dalam Surah al-An'am (6) ayat 116:

وَإِن تُطِعْ أَكْثَرَ مَن فِي الْأَرْضِ يُضْلُلُوكَ عَن سَبِيلِ اللَّهِ

إِن يَتَّبِعُونَ إِلَّا الظَّنَّ وَإِنْ هُمْ إِلَّا يَخْرُصُونَ

Maksudnya: *Dan jika engkau menurut kebanyakan orang yang ada di muka bumi, nescaya mereka akan menyesatkan engkau daripada jalan Allah; tiadalah yang mereka turut melainkan sangkaan semata-mata, dan mereka tidak lain hanyalah berdusta. (116)*

BAHAGIAN 3

IMAN

3 IMAN

Dari segi bahasa, perkataan Iman (إيمان) diambil daripada kata kerja "Aamana" (أَمَنَ) yang bermaksud "percaya" atau "Yukminu" (يُؤْمِنُ) yang bererti "percaya" atau "membenarkan". Ia juga membawa pengertian yang sama seperti Iktikad (اعتقاد), tapi pada pengertian berbeza.

Manakala dari segi pengertian secara harafiah dalam Islam, Iman (إيمان) bererti "percaya kepada Allah". Dengan itu orang yang beriman adalah ditakrifkan sebagai orang yang percaya (mukmin). Perkataan Iman yang bererti "membenarkan" itu disebutkan dalam al-Quran, di antaranya dalam Surah at-Taubah (9) ayat 61:

وَمِنْهُمُ الَّذِينَ يُؤْذِنُونَ الَّتِي وَيَقُولُونَ هُوَ أَذْنٌ قُلْ أَذْنُ حَيْرٍ
لَّكُمْ يُؤْمِنُ بِاللَّهِ وَيُؤْمِنُ لِلْمُؤْمِنِينَ وَرَحْمَةُ اللَّهِ لِلَّذِينَ ءَامَنُوا
مِنْكُمْ وَالَّذِينَ يُؤْذِنُونَ رَسُولَ اللَّهِ لَهُمْ عَذَابٌ أَلِيمٌ ﴿٦١﴾

Maksudnya: Dan di antara mereka (yang munafik itu) ada orang-orang yang menyakiti Nabi sambil mereka berkata: "Bahawa dia (Nabi Muhammad) orang yang suka mendengar (dan percaya pada apa yang didengarnya)". Katakanlah: "Dia mendengar (dan percaya) apa yang baik bagi kamu, ia beriman kepada Allah dan percaya kepada orang mukmin, dan ia pula menjadi rahmat bagi orang-orang yang beriman di antara kamu". Dan orang-orang yang menyakiti

Rasulullah itu, bagi mereka azab seksa yang tidak terperi sakitnya. (61)

Dalam Islam, hanya sekadar mempercayai (yukminu) adalah masih belum memadai sebagai beriman jika masih tidak beramal dan berpegang dengan iktikad. Seperti yang tertulis dalam Surah al-Hujurat (49) ayat 14:

فَقَالَتِ الْأَعْرَابُ إِمَّا قُلْ لَمْ تُؤْمِنُوا وَلَكِنْ قُولُوا أَسْلَمْنَا
وَلَمَّا يَدْخُلُ الْإِيمَانُ فِي قُلُوبِكُمْ وَإِنْ تُطِيعُوا اللَّهَ وَرَسُولَهُ وَلَا
يَلْتَكُم مِّنْ أَعْمَالِكُمْ شَيْءٌ إِنَّ اللَّهَ عَفُورٌ رَّحِيمٌ


Maksudnya: Orang-orang "A'raab" berkata: " Kami telah beriman". Katakanlah (wahai Muhammad): "Kamu belum beriman, (janganlah berkata demikian), tetapi sementara iman belum lagi meresap masuk ke dalam hati kamu berkatalah sahaja: 'kami telah Islam '. Dan (ingatlah), jika kamu taat kepada Allah RasulNya (zahir dan batin), Allah tidak akan mengurangkan sedikitpun dari pahala amal-amal kamu, kerana sesungguhnya Allah Maha Pengampun, lagi Maha Mengasihi". (14)

Pengertian iman dari sudut istilah ialah *tasdik* (membenarkan) dalam hati, berikrar (mengakui) dengan lidah dan beramal dengan perbuatan dalam melaksanakan semua perintah Allah SWT dan meninggalkan semua perkara yang dilarang.

Ringkasnya orang yang beriman ialah orang yang percaya, mengaku dan beramal. Tanpa tiga syarat ini, seseorang itu belum boleh dikatakan beriman yang sempurna. Ketiadaan salah satu daripada yang tiga itu seseorang itu akan digelar fasik, munafik atau kafir.

3.1 Cabang-cabang Iman

Iman ibarat sebuah pohon, iman itu memiliki cabang-cabang. Dalam hadis Riwayat Imam al-Bukhari (5578) dan Imam Muslim (100), Rasulullah SAW bersabda:

لَا يَرْبِّي النَّارِي حِينَ يَرْبِّي وَهُوَ مُؤْمِنٌ، وَلَا يَسْرِقُ حِينَ
يَسْرِقُ وَهُوَ مُؤْمِنٌ، وَلَا يَشْرُبُ الْحَمَرَ حِينَ يَشْرُبُهَا
وَهُوَ مُؤْمِنٌ


Bermaksud: “Tidaklah seorang penzina itu berzina sedangkan dia dalam keadaan dia beriman. Tidaklah seorang pencuri itu mencuri sedangkan dia dalam keadaan dia beriman dan tidaklah seorang pemimum arak itu memimum arak dalam keadaan dia beriman.”

Dalam hadis lain yang diriwayatkan Imam Muslim (35/58), dari Abu Hurairah RA bahwa Rasulullah SAW bersabda:

إِيمَانٌ بِضَعْفٍ وَسَبْعُونَ أَوْ بِضَعْفٍ وَسِتُّونَ شُعْبَةً فَأَفْضَلُهَا
قَوْلُ لَا إِلَهَ إِلَّا اللَّهُ وَأَدْنَاهَا إِمَاطَةً الْأَذَى عَنِ الطَّرِيقِ
وَالْحَيَاءُ شُعْبَةٌ مِنَ الإِيمَانِ

Bermaksud: “Iman itu mempunyai 70 cabang lebih atau 60 cabang lebih. Yang paling afodalnya ialah ucapan “لَا إِلَهَ إِلَّا اللَّهُ” dan yang paling rendahnya adalah membuang apa yang menyakitkan dari jalan. Dan malu itu sebahagian daripada iman

Kedua-dua hadis ini adalah hadis yang sahih diriwayatkan oleh Imam al-Bukhari (1/48,49) dan Imam Muslim (35). Al-Hafidz Ibnu Hajar telah meringkas pembahasan ini dalam kitabnya Fathul Bari, sesuai keterangan Ibnu Hibban, beliau berkata: “Cabang-cabang ini terbahagi dalam amalan hati, lisan dan badan”.



Rajah 4 : Cabang-cabang Iman

3.1.1 Amalan Hati

Amalan hati adalah iktikad dan niat. Terdapat 24 sifat (cabang); iman kepada Allah SWT, termasuk ke dalamnya iman kepada zat dan sifat-sifat-Nya serta pengEsaan bahawa Allah SWT adalah sebagaimana di dalam Surah ash-Shura (42) ayat 11:

لَيْسَ كَمِثْلِهِ شَيْءٌ وَهُوَ السَّمِيعُ الْبَصِيرُ ...



Maksudnya: ...Tiada sesuatupun yang sebanding dengan (ZatNya, sifat-sifatNya, dan pentadbiranNya) dan Dia-lah Yang Maha Mendengar, lagi Maha Melihat. (11)

Serta beriktikad bahawa selain-Nya adalah baharu, iaitu makhluk. Beriman kepada Allah SWT, beriman kepada malaikat-malaikat, kitab-kitab dan para rasul-Nya. Beriman kepada qadar (ketentuan) Allah SWT, yang baik mahu pun yang buruk.

Beriman kepada Hari Akhirat, termasuk di dalamnya pertanyaan dalam kubur, kenikmatan dan azabnya, kebangkitan dan pengumpulan di Padang Mahsyar, hisab (perhitungan amal), mizan (timbangan amal), sirat (titian di atas neraka), syurga dan neraka. Kecintaan kepada Allah SWT, cinta dan marah kerana Allah SWT. Kecintaan kepada Nabi SAW dan yakin atas keagungan Baginda SAW, termasuk di dalamnya berselawat atas Nabi SAW dan mengikuti sunahnya.

Ikhlas, termasuk di dalamnya meninggalkan riya dan nifaq. Taubat dan takut, berharap, bersyukur, menepati janji, sabar, reda dengan qada dan qadar, tawakal,

kasih sayang dan tawaduk (rendah hati). Termasuk tawadhu adalah menghormati yang lebih tua, mengasihi yang kecil, meninggalkan sifat sompong dan bangga diri, meninggalkan perasaan hasad dengki, iri hati dan emosi.

3.1.2 Amalan Lisan

Amalan secara lisan terdapat tujuh cabang iaitu mengucapkan kalimah tauhid, iaitu bersaksi bahawa tidak ada yang berhak disembah melainkan Allah SWT dan bahawa Muhammad SAW adalah Rasul Allah SWT, membaca al-Quran, menuntut ilmu dan mengajarkannya, berdoa, berzikir yang termasuk di dalamnya istighfar, bertasbih dan menjauhi perkataan yang sia-sia.

3.1.3 Amalan Tingkah-laku / Perbuatan

Amalan yang melibatkan aktiviti fizikal. Ia terdiri dari tiga cabang;

- 1) Aktiviti yang berbentuk kebendaan** seperti bersuci, baik secara lahiriyah maupun hukumiyah, termasuk di dalamnya menjauhi barang-barang najis, menutup aurat, solat fardu dan sunat, zakat, dan memerdekaan hamba sahaya.

Amalan dermawan, termasuk didalamnya memberi makan orang lain, memuliakan tetamu. Puasa, fardu ataupun sunat, iktikaf, mencari lailatul qadar, haji, umrah dan tawaf.

Memenuhi nazar, berhati-hati dalam soal sumpah (iaitu bersumpah dengan nama Allah SWT secara jujur, hanya ketika sangat memerlukan sesuatu perkara itu), memenuhi kifarat (denda), misalnya

kifarat sumpah dan kifarat hubungan suami isteri di bulan Ramadan.

- 2) **Aktiviti yang berkaitan dengan hawa nafsu** iaitu menjaga diri dari perbuatan maksiat (zina) dengan bernikah, memenuhi hak-hak keluarga, berbakti kepada kedua orang tua, termasuk tidak menderhakainya dan mendidik anak-anak. Silaturrahim, taat kepada penguasa (dalam hal-hal yang bukan merupakan maksiat kepada Allah SWT) dan kasih sayang kepada hamba sahaya.
- 3) **Aktiviti yang berkaitan dengan hal-hal umum** iaitu menegakkan kepimpinan secara adil, mengikuti jamaah, taat kepada *ulil amri* (ketua), melakukan *islah* (penambahbaikan) diantara manusia, termasuk memerangi para pemberontak. Tolong-menolong dalam kebaikan dan ketakwaan, *al-amru bi al-ma'ruf wa nahyu an al-munkar* (mengajak kepada kebaikan dan mencegah dari kejahanatan), melaksanakan hudud (hukuman-hukuman yang telah ditetapkan Allah SWT).

Jihad, termasuk menjaga wilayah Islam dari serangan musuh, melaksanakan amanat, membayar hutang, memuliakan tetangga, bergaul secara baik, mencari harta secara halal, membelanjakan harta kepada yang berhak, meninggalkan sikap boros dan berfoya-foya. Menjawab salam, mendoakan orang bersin yang mengucapkan alhamdulillah, mencegah diri dari menimpa bahaya kepada manusia, menjauhi perkara yang tidak bermanfaat, serta menyingkirkan sesuatu yang mengganggu manusia di jalan dan lain-lain.

Oleh kerana itu, para dai hendaklah memulakan dakwahnya dari cabang iman yang paling utama, kemudian diikuti cabang-cabang yang lain yang ada di bawahnya. Dengan kata lain, membangun asas terlebih dahulu (tauhid), sebelum mendirikan bangunan (cabang-cabang iman yang lain).

3.2 Perkara-perkara yang Membatalkan Iman

Pengertian iman dari sudut istilah ialah *tasdik* (membenarkan) dalam hati, berikrar (mengakui) dengan lidah dan beramal dengan perbuatan dalam melaksanakan semua perintah Allah SWT dan meninggalkan semua perkara yang dilarang.

Setiap Muslim wajib memelihara imannya daripada terbatal. Firman Allah SWT dalam Surah ali-Imran (3) ayat 102:

يَأَيُّهَا الَّذِينَ ءَامَنُوا أَتَقْوِ أَلَّهَ حَقَّ تُقَاتِهِ وَلَا تَمُوتُنَ إِلَّا
وَأَنْتُمْ مُسْلِمُونَ ﴿١٠٢﴾

Maksudnya: Wahai orang yang beriman! bertaqwalah kamu kepada Allah, dengan sebenar-benar taqwa, dan jangan sekali-kali kamu mati melainkan dalam keadaan Islam. (102)

Iman boleh terbatal melalui iktikad (keyakinan dalam hati), perkataan dan perbuatan. Iman akan terbatal dengan mengingkari hukum Allah SWT dan tidak percaya dengan Rukun Islam dan Rukun Iman. Iman juga akan terbatal disebabkan iktikad (keyakinan dalam hati), contohnya meyakini bahawa tiada Tuhan yang mencipta alam ini. Iman terbatal disebabkan perkataan, contohnya mengatakan Allah SWT mempunyai anak. Selain itu iman boleh terbatal

disebabkan perbuatan, contohnya menyembah pokok, patung dan sebagainya.



Rajah 5 : Perkara yang Boleh Membatalkan Iman

3.2.1 Antara Perkara-perkara yang Boleh Membatalkan Iman

1) Syirik

Syirik ialah menyekutukan, percaya dan menyembah selain daripada Allah SWT. Firman Allah SWT dalam Surah al-Nisa' (4) ayat 48:

إِنَّ اللَّهَ لَا يَغْفِرُ أَن يُشْرِكَ بِهِ وَيَغْفِرُ مَا
 دُونَ ذَلِكَ لِمَن يَشَاءُ وَمَن يُشْرِكُ بِاللَّهِ
٤٨
 فَقَدِ افْتَرَى إِثْمًا عَظِيمًا

Maksudnya: Sesungguhnya Allah tidak akan mengampunkan dosa syirik memperseketukanNya (dengan sesuatu apajua), dan akan mengampunkan dosa yang lain dari itu bagi sesiapa yang dikehendakiNya (menurut aturan SyariatNya). Dan sesiapa yang memperseketukan Allah (dengan sesuatu yang lain), maka sesungguhnya ia telah melakukan dosa yang besar. (48)

Syirik adalah dosa besar yang paling besar, Riwayat Imam al-Bukhari (6919). Rasulullah SAW bersabda:

أَكْبَرُ الْكَبَائِرِ إِلَإِشْرَاكُ بِاللَّهِ

Bermaksud : “Dosa besar yang paling besar, adalah menyekutukan (sesuatu) kepada Allah.”

a) Pembahagian Syirik

Syirik dibahagikan kepada dua bahagian iaitu;

- i. **Syirik *Jali*** yang bermaksud perbuatan syirik secara jelas.
Contoh :
menyembah berhala, mengaku Nabi Isa anak tuhan.
- ii. **Syirik *Khafi*** bermaksud tidak meletakkan Allah SWT sahaja dalam niat terutamanya dalam melakukan ibadah.
Contohnya :
solat kerana hendak menunjuk-nunjuk, mengagumi diri sendiri, sompong, bangga diri.

b) Jenis-jenis Syirik

Perbuatan syirik itu ada bermacam-macam jenis dan tidak semuanya mengeluarkan pelakunya daripada agama Islam. Walaupun kesemuanya dikira dosa besar, tahapnya tidak semuanya sama.

Imam as-Sanusi dalam al-Muqaddimat membahagikan syirik kepada enam jenis:

- i. **Syirik *istiqlal*** : Menetapkan adanya dua tuhan atau lebih yang berlainan seperti akidah Majusi yang mempercayai adanya Ahura Mazda dan Angra Mainyu.
- ii. **Syirik *tab'id*** : Menyatukan tuhan daripada beberapa oknum seperti akidah Triniti agama Kristian.
- iii. **Syirik *taqrib*** : Beribadah kepada sesuatu selain daripada Allah SWT dengan tujuan untuk mendekatkan diri kepada Allah SWT.
- iv. **Syirik *taqlid*** : Beribadah kepada Allah SWT kerana mengikut orang lain.

- v. **Syirik asbab** : Menyandarkan satu kesan terhadap sebab tertentu yang bersifat adat seperti berpegang bahawa manusia kenyang kerana makan, dan bukan Allah SWT yang mengenyangkannya.
- vi. **Syirik aghrad** : Beramal kerana selain daripada Allah SWT.

Justeru seseorang yang telah memeluk Islam wajib meninggalkan penyembahan dan kepercayaan tuhan yang lama dan hanya menyembah Allah SWT yang Maha Esa.

2) Murtad

Dari segi bahasa, *murtad* atau *riddah* membawa maksud beralih daripada sesuatu kepada sesuatu yang lain.

Murtad ialah beralih daripada Islam kepada agama lain atau anutan lain. Murtad bermaksud keluar daripada agama Islam. Murtad boleh berlaku melalui beberapa sudut iaitu **iktikad, perbuatan dan perkataan**. Iktikad iaitu berniat hendak keluar dari agama Islam. Melalui perkataan iaitu dengan menyatakan atau mengisyiharkan dirinya keluar daripada agama Islam. Melalui perbuatan menganut agama selain daripada agama Islam dan mengamalkan ajaran agama lain.

Murtad adalah seburuk-buruk kekufuran, dan diantara dalil keburukannya ialah firman Allah SWT, Surah al-Baqarah (2) ayat 217:

...وَمَن يَرْتَدِدْ مِنْكُمْ عَن دِينِهِ فَيَمْتُ
وَهُوَ كَافِرٌ فَأُولَئِكَ حَيْطَنُ أَعْمَلُهُمْ فِي
الْأَرْضِيَا وَالْآخِرَةِ وَأُولَئِكَ أَصْحَابُ النَّارِ هُمْ

فِيهَا خَلِيلُونَ ﴿٢٧﴾

Maksudnya: ...Dan sesiapa diantara kamu yang murtad (berpaling tadaht) dari agamanya (agama Islam), lalu ia mati sedang ia tetap kafir, maka orang yang demikian rosak binasalah amal usahanya (yang baik) di dunia dan di akhirat, dan mereka itulah ahli neraka, mereka kekal di dalamnya (selama-lamanya). (217)

Dan firmannya, Surah al-Nahl (16) ayat 106:

مَن كَفَرَ بِاللَّهِ مِنْ بَعْدِ إِيمَانِهِ إِلَّا مَنْ
أُكْرِهَ وَقَلْبُهُ مُطْمَئِنٌ بِالْإِيمَانِ وَلَكِنْ
مَن شَرَحَ بِالْكُفُرِ صَدْرًا فَعَلَيْهِمْ

غَصَبٌ مِنَ اللَّهِ وَلَهُمْ عَذَابٌ عَظِيمٌ ﴿٦٧﴾

Maksudnya: Sesiapa yang kufur kepada Allah sesudah ia beriman (maka baginya kemurkaan dan azab dari Allah) kecuali orang yang dipaksa (melakukan kufur) sedang hatinya tenang tenteram dengan iman; akan tetapi sesiapa yang

terbuka hatinya menerima kufur maka atas mereka itu tertimpa kemurkaan dari Allah, dan mereka pula beroleh azab yang besar. (106)

3) Kufur

Kufur bermaksud tidak percaya kepada Allah SWT serta mengingkari ajaran yang disampaikan oleh Nabi Muhammad SAW. Golongan ini digelar sebagai kafir. Kafir dibahagikan kepada dua bahagian;

Kufur Hakikat yang bermaksud ingkar atau menafikan Rukun Iman dan menolak syariat yang dibawa oleh Rasulullah SAW. Contohnya tidak percaya dengan Rukun Iman dan Rukun Islam. Kufur ini boleh mengakibatkan seseorang itu terkeluar daripada Islam.

Kufur Nikmat yang bermaksud mengingkari Allah SWT sebagai pemberi nikmat. Contohnya boros dalam berbelanja, tidak bersyukur, tidak bersedekah. Kufur ini tidak membuatkan seseorang itu keluar daripada Islam.

4) Khurafat

Khurafat bermaksud kepercayaan dan perbuatan karut yang dianggap mempunyai hubungan dengan agama Islam, sedangkan pada hakikatnya bertentangan dengan agama Islam. Khurafat ialah semua cerita sama ada rekaan atau khayalan, ajaran-ajaran, pantang larang, adat istiadat, ramalan-ramalan, pemujaan atau kepercayaan yang menyimpang dari ajaran Islam. Khurafat merangkumi cerita dan perbuatan yang direka dan bersifat karut dan dusta.

5) Sihir

Sihir ialah ilmu yang berkaitan perbuatan halus melalui pertolongan makhluk ghaib seperti bantuan syaitan, jin dan iblis melalui pemujaannya. Sedangkan Allah SWT adalah tempat manusia memohon pertolongan. Sebagaimana dalam Surah al-Baqarah (2) ayat 102:

وَاتَّبَعُوا مَا تَشْتُرُوا أَلَّا شَيْطَانٌ عَلَىٰ مُلْكِ
سُلَيْمَانَ ۖ وَمَا كَفَرَ سُلَيْمَانُ وَلَكِنَّ
الشَّيْطَانَ كَفَرُوا يُعَلِّمُونَ النَّاسَ
السِّحْرَ وَمَا أُنزِلَ عَلَى الْمُلَكَيْنِ يَبَأِلَ
هُرُوتَ وَمَرْوُثَ وَمَا يُعَلِّمَانِ مِنْ أَحَدٍ
حَتَّىٰ يَقُولَا إِنَّمَا نَحْنُ فِتْنَةٌ فَلَا تَكْفُرُ
فَيَتَعَلَّمُونَ مِنْهُمَا مَا يُفَرِّقُونَ بِهِ يَبَيِّنَ
الْمَرْءُ وَرَوْجِهُ وَمَا هُمْ بِضَارِّينَ بِهِ مِنْ
أَحَدٍ إِلَّا بِإِذْنِ اللَّهِ وَيَتَعَلَّمُونَ مَا يَضُرُّهُمْ
وَلَا يَنْفَعُهُمْ وَلَقَدْ عَلِمُوا لَمَنِ اشْتَرَلُهُ مَا
لَهُو فِي الْآخِرَةِ مِنْ خَلَقِي وَلَيُّسَّ مَا شَرَوْا
بِهِ إِنْفَسَهُمْ لَوْ كَانُوا يَعْلَمُونَ ﴿٦﴾

Maksudnya: Mereka (membelakangi Kitab Allah) dan mengikut ajaran-ajaran sihir yang dibacakan oleh puak-puak Syaitan dalam masa pemerintahan Nabi Sulaiman, padahal Nabi Sulaiman tidak mengamalkan sihir yang menyebabkan kekufuran itu, akan tetapi puak-puak Syaitan itulah yang kafir (dengan amalan sihirnya); kerana mereka lah yang mengajarkan manusia ilmu sihir dan apa yang diturunkan kepada dua malaikat: Harut dan Marut, di negeri Babil (Babylon), sedang mereka berdua tidak mengajar seseorang pun melainkan setelah mereka menasuhatinya dengan berkata: "Sesungguhnya kami ini hanyalah cubaan (untuk menguji iman mu), Oleh itu janganlah engkau menjadi kafir (dengan mempelajarinya)". Dalam pada itu ada juga orang-orang mempelajari dari mereka berdua: ilmu sihir yang boleh menceraikan antara seorang suami dengan isterinya, padahal mereka tidak akan dapat sama sekali memberi mudarat (atau membahayakan) dengan sihir itu seseorang pun melainkan dengan izin Allah. Dan sebenarnya mereka mempelajari perkara yang hanya membahayakan mereka dan tidak memberi manfaat kepada mereka. Dan demi sesungguhnya mereka (kaum Yahudi itu) telahpun mengetahui bahawa sesiapa yang memilih ilmu sihir itu tidaklah lagi

mendapat bahagian yang baik di akhirat. Demi sesungguhnya amat buruknya apa yang mereka pilih untuk diri mereka, kalaularah mereka mengetahui. (102)

Jelaslah di sini bahawa sihir itu sesuatu yang menyimpang daripada akidah Islam. Oleh itu, mereka yang baharu memeluk Islam perlu menguatkan akidah dengan menyandarkan segala-galanya hanya kepada Allah SWT.

6) Nifaq

Nifaq bermaksud berpura-pura melahirkan keimanan sedangkan pada hatinya tetap kufur kepada Allah SWT. Sifat nifaq ialah berbohong apabila bercakap, mengkhianati apabila diberi amanah. Memungkiri janji apabila berjanji dan melampaui batas apabila bertengkar.

Nifaq (النَّفَاقُ) diambil dari kata (naafiqaa'). Nifaq secara bahasa ialah salah satu lubang tempat keluarnya yarbu (sejenis tikus) dari sarangnya, di mana jika ia dicari dari lubang yang satu, maka ia akan keluar dari lubang yang lain.

Dikatakan pula, ia berasal dari kata (nafaq) iaitu lubang tempat bersembunyi. Nifaq menurut syarak bererti menampakkan keislaman secara zahirnya tetapi menyembunyikan kekufuran dan kejahatan.

Allah SWT memperingatkan dengan firman-Nya dalam Surah At-Taubah (9) ayat 67:



إِنَّ الْمُنَافِقِينَ هُمُ الْفَسِيْقُونَ

Maksudnya: Sesungguhnya orang-orang munafiq itu, merekalah orang-orang yang fasik. (67)

Justeru, mereka adalah orang-orang yang keluar daripada jalan kebenaran masuk ke jalan kesesatan.

3.3 Ciri-ciri Akidah yang Benar

Akidah menentukan tahap keimanan seseorang terhadap Allah SWT. Pengakuan terhadap keimanan kepada Allah SWT ini mestilah merangkumi pengakuan daripada hati dan dibuktikan dengan perbuatan melalui ibadahnya. Keyakinan tersebut juga perlu dilakukan secara bersungguh-sungguh dengan hanya menyembah Allah SWT sahaja. Terdapat beberapa ciri akidah yang benar:

- 3.3.1 Setiap manusia yang beriman perlu memiliki keyakinan yang teguh terhadap kewujudan, keesaan dan kekuasaan Allah SWT. Tiada selain Allah SWT yang berhak disembah dan wajib percaya bahawa Allah SWT itu Esa, satu dan tidak berbilang-bilang.
- 3.3.2 Pengakuan keimanan dilafazkan, seseorang Muslim mestilah menjauhkan diri daripada melakukan perbuatan syirik iaitu menyembah dan memohon pertolongan selain daripada Allah SWT.
- 3.3.3 Kepercayaan dan keyakinan terhadap akidah Islam itu berlandaskan al-Quran dan as-Sunah. Hal ini kerana al-Quran dan sunah akan memandu manusia dan mendorong seseorang beriman dengan sepenuhnya

kepada Allah SWT. Ajaran selain yang terkandung dalam al-Quran dan sunah mesti dielakkan bagi memastikan keutuhan dan kebenaran akidah yang diyakini agar tidak terpesong.

- 3.3.4** Tiada tolak ansur dalam perkara yang berkaitan dengan akidah. Hal ini bagi mengelakkan berlaku penyelewengan dan Islam yang dianuti dapat dipertahankan kesucian dan kebenarannya. Penambahan atau pengurangan dalam hal ibadat sebagaimana yang disyariatkan oleh Islam akan menceburkan diri kearah kerosakan atau mempersendakan ajaran Islam.

3.4 Ciri-ciri Akidah yang Salah

Apabila manusia mula lalai dan tidak mengikut ajaran yang disyariatkan dalam al-Quran dan sunah, maka mereka terdedah dengan akidah yang salah :

- 3.4.1** Melakukan syirik dan kufur kepada Allah SWT iaitu menyembah dan beribadah selain kepada Allah SWT. Hal ini dilakukan sama ada secara sedar atau tidak sedar apabila manusia memohon pertolongan daripada jin dan syaitan, meminta pertolongan daripada pokok, menyimpan patung di dalam rumah untuk dipuja, menyembah manusia dan sebagainya.
- 3.4.2** Apabila manusia mula tidak mempercayai perkara yang terkandung di dalam al-Quran dan sunah, menjadikan akidah seseorang mula terpesong. Mereka mula menolak adanya hari kiamat, mula mempertikaikan kerasulan Nabi Muhammad SAW dengan menimbulkan persoalan-persoalan yang menjatuhkan maruahnya dan melukiskan imej-imej yang memburukkan Nabi Muhammad SAW. Malah terdapat juga watak-watak yang mengaku dirinya

adalah Nabi selepas Nabi Muhammad SAW juga adalah akidah yang palsu dan tidak benar.

- 3.4.3** Menafikan keesaan, kewujudan dan kekuasaan Allah SWT di muka bumi ini merupakan kesalahan akidah yang jelas. Mereka menafikan kewujudan Allah SWT atau mengakui bahawa Allah SWT memiliki anak dan diperanakkan serta menimbulkan keraguan akan kemampuan Allah SWT menciptakan manusia, mematikan dan menghidupkan kembali selepas hari kiamat. Penafian ini menjadikan mereka lalai dan membuat kerosakan di muka bumi kerana tidak takut dengan ancaman api neraka atau seksaan yang akan diterima di akhirat kelak.
- 3.4.4** Menolak sebarang ajaran yang telah diperintahkan oleh Allah SWT dengan tidak melaksanakan mahupun menghindarkan diri daripadanya larangan-Nya. Penolakan tersebut kerana tidak mempercayai kewujudan Allah SWT yang menjadikan-Nya dan sentiasa memerhatikan segala amal perbuatannya.

BAHAGIAN 4

KESIMPULAN

4 KESIMPULAN

Kesimpulannya, apabila mereka telah mengenal pasti agama yang dapat memenuhi keperluan hati iaitu ketenangan dirinya, maka mereka akan terus menerus mencarinya sehingga mendapat agama Islam itu menepati kehendak fitrah tabii manusia. Fitrah tabii yang dimaksudkan ialah berkehendakkan ketuhanan yang hak dan beramal dengan ajaran-Nya sehingga dirinya merasai ketenangan dan kebahagiaan yang mutlak. Tetapi dalam proses pencarian kebenaran sesuatu agama itu tersebut, mereka akan menghadapi situasi kesamaran, ketidakyakinan, kekeliruan dan kesangsian dalam diri mereka yang akhirnya membawa kepada cabaran spiritual dalam pencarian dan menentukan agama yang seiring dengan fitrah dirinya. Secara tidak langsung ini menunjukkan bahawa dalam proses mencari kebenaran bukannya sesuatu yang mudah. Ini kerana mereka akan mengalami peringkat perubahan agama di mana mereka menukar kepercayaan anutan agama asalnya kepada kebenaran Islam. Individu yang melakukan pertukaran agama akan mengalami lima peringkat:

Pertama ialah peringkat tenang, iaitu mereka tidak mempersoalkan tentang kebenaran agama yang baru dianut; begitu juga, tidak wujudnya dorongan untuk mencari sesuatu yang baru dan segala rutin kehidupannya berjalan seperti biasa.

Kedua ialah peringkat konflik kepercayaan, iaitu mereka sedang mencari kekuatan dalaman dalam proses peneguhan kepercayaan baru; mereka akan mendapatkan maklumat tentang agama Islam dan pengetahuan agama Islam dalam pemikirannya akan dapat membantu mereka untuk memilih Islam sebagai pegangan baharunya.

Ketiga merupakan peringkat perubahan iaitu peringkat pertembungan emosi untuk mengakui kebenaran Islam; ini menyebabkan mereka terdorong untuk memeluk Islam dengan mencari atau mempelajari, mendalami, menghayati dan seterusnya mengamalkan ajaran Islam dalam kehidupannya.

Keempat ialah peringkat tenang semula, iaitu peringkat individu yang melakukan konversi merasa tenang dalam menganuti agama Islam; pada peringkat ini merupakan masa saudara baharu berhadapan dengan alam baharu iaitu pengubahsuaian cara hidup untuk berhadapan dengan ahli keluarga dan masyarakat sekeliling. Pada masa yang sama, mereka akan menghadapi cabaran yang mengganggu ketenangan jiwa mereka selepas memeluk Islam.

Kelima ialah penghayatan dan pengukuhan amalan. Peringkat ini adalah untuk meningkatkan kepercayaan agama baharu dimana peringkat ini lebih kepada menghayati dan mengamalkan ajaran Islam tanpa sebarang gangguan dan paksaan. Jika diteliti untuk melalui setiap peringkat terlalu banyak cabaran yang terpaksa ditempuhi oleh saudara baharu bagi menuju kejalan kebenaran Islam terutamanya daripada segi psikologi. Secara tidak langsung, ini menunjukkan bahawa proses penyesuaian diri dengan agama baharu memang mencabar kehidupan golongan mualaf iaitu cabaran kepada mental dan emosi mereka untuk berjinak-jinak dengan Islam. Cabaran psikologi ini juga dikatakan berlaku rentetan daripada cabaran lain diawal pengislamannya antaranya daripada segi kewangan, tentang keluarga dan diberhentikan kerja oleh majikan. Cabaran ini akan membawa kepada mereka mengalami tekanan daripada segi psikologi seperti kemurungan, kekeliruan, kerisauan dan kegelisahan yang tinggi, stress dan lebih dari itu ialah hilang akal atau kemurungan.

RUJUKAN

- Ab Aziz Mohd Zin (2011) *Aqidah Islam dan Tuntutannya*. (Kuala Lumpur: Persekutuan Seruan Islam Selangor dan Wilayah Persekutuan (JAM'IYAH))
- Ab. Latif Muda, Dr. Rosmawati Ali @ Mat Zin, Dr, (2014) *Ilmu Tauhid*, (Kuala Lumpur; Pustaka Salam)
- Al-Syeikh Muhammad Jamaluddin Al-Qasimi Ad-Dimasqi (2014) *Mutiara Ihya' Ulumuddin Hak Milik Imam Muslim Imam Ghazali*, (Shah Alam: Illusion Network)
- Asming Yalawae, Mustafa 'Afifi Ab. Halim, Wan Abdul Fattah Wan Ismail, Akidah: Peranan dan Kepentingannya dalam Memelihara Keharmonian Rumah Tangga. *Jurnal Usuluddin*, Bil. 33 (Januari –Jun 2011) 1- 18
- Nizar Hammadi, (1438H) *Pembahagian Tauhid Menurut Ahli Sunah Wal Jamaah Al-Asyairah* (Tunis: Dar Ibn Arafah)
- Noreha Che Abah, Asmawati Suhid dan Fatiyah Mohd Fakhrudin, *Jurnal Al-Anwar*, Bil 2 (Disember 2019)1-13
- Razif, M. (2019, Januari 29). AL-AFKAR #40: Jenis-Jenis Syirik dicapai pada 2 Mac 2021, pada pautan <https://muftiwp.gov.my/artikel/al-afkar/3064-al-afkar-40-jenis-jenis-syirik>
- T.Prgg (2015) *Modul Kurikulum Kelas Pengajian Agama Islam PERKIM*, Unit Perancangan, Penyelarasan dan Pelaksanaan Bahagian Dakwah PERKIM
- Zulkiple Abd Ghani, Anuar Puteh, Badlihisham Mohd Nasir et. Al (2009) *Sistem dan Modul Pengajaran dan Pembelajaran Saudara Imam Muslim [SMMPPSM]* (Universiti Kebangsaan Malaysia [UKM], Majlis Agama Islam Wilayah Persekutuan [MAIWP])

BUKU TEKS KELAS PENGAJIAN ISLAM PERKIM

AKIDAH

TAHAP PERTENGAHAN

ISBN 978-967-25609-2-0



9 7 8 9 6 7 2 5 6 0 9 2 0



PERTUBUHAN KEBAJIKAN ISLAM MALAYSIA (PERKIM) 2021